

ACTA ERUDITORUM

publicata Lipsiæ

Calendis Junii, Anni MDC LXXXVII.

JOH. HENRICI HEIDEGGERI IN VIAM Concordiæ Protestantium Ecclesiasticæ Manu- ductio.

Amstelodami, apud Henr. Wetstein, 1687.

ERuditionem & claritudinem Viri non est quod hic commende-
mus, jam satis orbi literario notam. Hoc tractatu propensum
ad pacem ecclesiasticam inter Protestantes studium ostendit;
quod quidem pios omnes merito tenet, licet successus non nisi
a singulari Dei gratia, qua infinita pene obstacula superentur, expectari
possit. Agnoscit hoc ipse Autor in libelli præfatione, temporum ta-
men & judicii divini contemplatione excitatum se ad scribendum pro-
fiteretur. In duas autem diatribas distribuit, quæ proponenda habuit.
In prima, præmissis prius aut repetitis deinde causis, quæ dissentientes
ad pacem movere debeant, a pietate & necessitate deductis, ante om-
nia consensum utriusque Confessionis, *Augustanæ & Reformatæ*, in
maximis fidei articulis laudat & probat. Communem notat Augustanæ
subscriptionem, quam huc usque ab omnibus Theologis Reformatis,
qui in Academiis Germaniæ doctorum titulum assumunt, & a se ipso
factam esse refert §. 12. Cum vero objici posse animadvertat, acta
Synodi *Dordracenæ*, aut quæ eam præcessit, *Delpensis*, in quibus
negatur, Reformatos Lutheranorum confessionem unquam recepisse;
diluere id vult aliquibus rationibus, & testimonio *Gisberti Voetii*
celebris inter Reformatos Belgas Theologi, qui Synodi utriusque
membrum fuit. Dicit itaque, non *Augustanam* Confessionem anni 1530. sed
Formulam Concordiæ, quam genuinam *Flacianorum*, seu *Neo Lutherano-
rum* confessionem appellat, intellectam esse. Hæc ex §. 13. referi-

mus, nulla approbandi intentione; neq; enim ignari sumus, quomodo nostrates *Flacianismi* & *Neo-Lutheranismi* impurationes pro contumeliosis habeant. Disputat inde §. 14. de Augustanæ confessionis variatione, de qua tot lites ortæ sunt; per eam enim rerum nullam, sed tantum modi doctrinæ differentiam inductam esse censet, putatque Luthero consentiente, vel saltem non dissentiente, mutationem factam esse. Hac stante, in articulum decimum Aug. Conf. consentire ait omnes Reformatorum confessiones; nullam enim esse, quæ neget vere ad se in Cæna Domini, & vescentibus distribui corpus & sanguinem J. C. Disceptari solum de modo præsentia, qui in prima Aug. Conf. editione per verba *sub specie panis & vini*, quæ in posteriori expuncta sunt, vel Pontificio dogmati favere, vel præsentiam *in, cum & sub pane*, sive secundum loci indistantiam complecti videatur: cum tamen Reformati illam tantum admittant, quæ mediante verbo & symbolis, per os fidei, interiori homini exhibetur, sic ut pii per fidem communionem symbolis confirmatam cum Christo habeant, & in ipso vivant. (sunt verba Autoris §. 17.) Sententiam vero illâ de indistantia loci sive ubi-quitate, ne Luthero quidem, nedum Melanchthoni confessionis autori, aut Philippo Hassiæ Principi eam subscribenti, in mentem venisse putat, ideoq; nec clausula Articuli, qua secus docentes improbantur, Reformatos, sed Anabaptistas, aut eos qui nuda signa asserbant, tangi existimat. Levioris momenti esse judicat Art. XI. de confessione privata, item Art. XII. de perseverantia iustorum: hic enim iterum Anabaptistas damnari, qui ἀναμάρτησιαν statuunt, non Reformatos, qui eam non asserant, sed gratiam ad tempus amitti posse non negent, eatenus Puritanis & Catharis non minus ac Anabaptistis repugnantes. Duriora sunt, quæ §. 22. adversus illos ex Lutheranis, qui Formulam Concordiæ acceptarunt, differuntur. Interim §. 23. vel ex illa ipsa Formula Concordiæ pro certo supponitur, Augustanam confessionem utriusque partis symbolum commune confessionis & confessionationis esse, adeoque neutram partem ab altera damnari, aut hæreseos ream haberi posse. Controversias postea distinguit in incertas & certas. Inter illas refert imputationes ex consequentis, vel crudis particularium doctorum dictis, collectas. Inter has numerat quæstionem de Sacramentis a Luthero cum Carolo Ostadio & Zwinglio agitari cœptam, quæ sola A. 1529 in colloquio Marburgensi a consentientibus in reliqua, excepta fuerit; in qua tamen utrosq;

phrasi-

phrasibus incommodis usos esse, se ipso; mutuo non intellexisse, & de verbis potius quam re pugnasse, Calvini iudicio asseverat, §. 30. Memorat inde, ut occasione istius de Sacramento disceptationis de *abiquitate* quam vocant, circa an. 1557, & paulo post dein de *predestinatione & gratia* disputari coeptum sit, quibus & alia accesserint, a quibusdam, inter quos D. *Jacobum Anicam* & *Job. Eickardum* §. 31. notat, ultra modum aucta; imminuta vero, quoties ad colloquia res pervenerit, qualia Lipsiæ A. 1631 & Cassellæ A. 1662 habita refert. Neque tamen dissimulat, quæ in posteriori conventa sint, ab altero ex Theologis Rintelensibus D. *Petro Musæo* in dubium revocata, & Wittenbergensibus Theologis improbata esse. Tractat inde pluribus de distinctione articulorum fundamentalium, & statum controversiæ de S. Cœna proponit, ex quo concludit, eam non esse de fundamento. Pari modo §. 49. *Et seqq.* de controversia circa *Personam Christi* disserit, eam etiam pro verbali habens, & quæ facile tolli possit, sublata catachresi phrasium. Pergit inde §. 55. *Et seqq.* ad quæstionem de *predestinatione*, neque hanc pro fundamentali agnoscit. Idem statuit de disputatione circa *gratiam universalem* §. 62. *Et seqq.* de *efficacia gratia convertentis* §. 64. de *perseverantia sanctorum* §. 66. *Et seqq.* Non magis ad fundamentum pertinere tradit lites de *baptismo* §. 68, & speciatim de *exorcismo* §. 70. Summa eo redit §. 71. *Et seqq.* controversias, quas collocutores Lipsienses, Cassellani & Rintelenses superesse judicarunt, ad fundamentum fidei ac salutis fidelium nihil attinere, sed plerasque stipulares esse, quæ in oculis fratrum non trabis, sed festucæ locum habeant. Addit tamen Autor protestationem §. 73, se ista charitate, qua dissentientes ab erroribus fundamentalibus absolvit, nolle veritati sententiæ, quam ipse cum Reformatis in articulis controversis tenet, præjudicare; infirmitati quidem ignoscendum, sed non imitandam illam aut suscipiendam esse: optandum potius & annitendum, ut erroribus qualibuscunque omnes liberentur; interim vero, ut in rei summa concordēs, sese mutuo tolerant, & per vincula Spiritus & pacis sese conjungant.

Diatribæ secunda suadet Autor Protestantibus concordiam, non obstante dissensu in nonnullis (quas exigui momenti esse censuit) quæstionibus; ita tamen, ut veritati non fiat præjudicium: absque illa enim nullam iniri posse pacem. Zelum saltem intempestivum improbat, allegatis §. 6. verbis *Job. Matthiæ Sreghensis* in Suecia Episcopi, ex

tractatu *Ramo olive* A. 1656. edito, & concedit retineri posse, salva veritate & concordia, diversas opiniones. Inde § 8. duodecim argumentis sententiam suam adstruit, quorum primum §. 9. & seqq. ex lege charitatis deducit, ostenso quomodo illa per contentiones lædatur. Exempla Christi & Apostolorum, infirmitates tolerantium proponit (arg. 2.) §. 17. itemque primitivæ & priscae Ecclesiæ, (arg. 3.) §. 19. speciatim Cyrilli Alex. & Johannis Antioch. His comparat *Lutheri* & *Carolostadii*, nec non hyperaspistarum, inde *Amsdorffii*, hinc *Zwinglii* contentiones §. 23. Statum præterea Ecclesiæ militantis, quæ imperfectione non careat, (arg. 4.) considerari jubet, adducta doctrina Apostoli I. Cor. XIII, cui repugnent, qui errantium personas odio errorum implicant. Vincula spiritualis unitatis Eph. IV. 3. 6. descripta, §. 26. (arg. 5.) in utroque Protestantium cœtu salva esse affirmat. Providentiam Dei (arg. 6.) qua utrique ab erroribus Pontificiis olim liberati, & huc usque, sicut & ab aliis hæresibus conservati fuerint, incitamentum concordie præbere judicat §. 30. & seqq. Idem suadet (arg. 7.) ex communione principiorum, speciatim in articulo justificationis, §. 33. & objectioni, quod *Reformati justificationes in decreto Dei particulari ponant, non sine querela adversus ejus argumenti autores responder, plenissimum de justificatione consensum inter partes esse demonstrandum sumens, non obstante disceptatione de ordine finis & mediorum in decreto prædestinationis, quo posito leviores dissensiones omnes conciliari posse arbitratur. Argumentatur* (8.) §. 38. & seqq. ab Ecclesiis ante reformationem sub Pontificatu pressis, vel ab eo exclusis & separatis, v. g. *Waldensibus* & *Bohemis*, quas pro veræ Ecclesiæ membris etiam *Lutherus* habuerit, itemque orientalibus quibusdam, quæ dissentientes licet a Protestantibus in nonnullis articulis, veræ tamen Ecclesiæ axioma non amiserint. Diluit exceptionem, quasi nunc intolerabilius erretur, ob clariores demonstrationes contrariæ sententiæ. (Arg. 9.) §. 44. spem concordie inde concipit, quod non solum ex parte Reformationum illa cupidissime desideretur, & dudum anno 1631 in Synodo Carentonenfi decreta & oblata fuerit, sed quod etiam inter Augustanæ confessionis Theologos, uti & Principes & Politicos, fuerint (quos nominat §. 46. & seqq.) eodem tendentes. Allegat articulum VII Pacis Westphalicæ A. 1648, per quem controversiæ inter Protestantes reservatæ sunt ulteriori compositioni.

sitioni, nec deesse hodie putat & Theologos, & Principes ac sapientes ex Politicis, qui promovere hoc negotium possint. Taxat tamen laxitatem eorum ex Aug. Conf. Theologis, qui etiam cum Pontificiis concordiam sanciri posse putaverint, & provocat ad dissertationem collegæ sui *D. Cassp. Wolphii de Articulis unionis inter Ecclesiam Romanam & Lutheranam nuper vulgatis*. Laudat corpus harmonicum confessionum, tanquam sancienda concordia palladium, & Lutheri exemplum, qui A. 1536 concordiam cum Argentinensibus & aliis superioris Germaniæ Theologis inierit, eamque literis, quarum verba allegat, ad Helvetios A. 1537 incredibili orationis (ut scribit) suavitate & devotione commendaverit. Dolet itaque illum postea animum mutasse, affectibus (ita putat) turbatum, secutamque concordia illius dissolutionem deplorat. Extollit aliam, inter Augustanæ & Helvetiæ confessionis coetus in Polonia A. 1570 *Sandomiria* compositam, & quædam ex literis a Polonis proceribus & Theologis ad Germanos An. 1578. datis refert. Exemplum etiam consensus inter Bohemos A. 1575 initii, & postea a Maximiliano II. Imp. confirmati proponit, qua A. 1606 labante etiam libertas Regni illius labascere coeperit. §. 60. (Arg. 10.) a Pontificiis ipsis discere Protestantes posse notat, si observent, quomodo illi concordiam colant, non obstante dissensu in plurimis & maxime momenti articulis, per concilium Tridentinum nequicquam sopito. E contrario rigorem illum ex Antichristi spiritu §. 62. (arg. 11.) profectum, quo Pontifex etiam levissimas dissensiones post definitionem Ecclesiæ continuatas, persequitur, imitari dicit, qui suas opiniones in articulis non fundamentalibus cum supercilio & anathemate aliis obtrudunt. Denique §. 63. (arg. 12.) horrenda damna, quæ ex discordiis huc usque in ecclesiam emanaverint, expendi monet; per has enim & Papatui & Mahometismo augmenta accessisse. Nec tacet simultates veteres inter Protestantes, quæ infelicem belli *Smalcaldici* superiori, & *Bohemo Germanici* nostro seculo gesti, eventum produxerint, non sine adversariorum risu, & lætis in futurum auguriis, quæ ex scriptis quibusdam adducit: judicia etiam Dei præsentia, & persecutiones utriusque parti inflictas aut intentatas, ob oculos ponit.

Nostrum non est, sententiam de re gravissimi momenti, cujus felix eventus ut omnibus desiderabilis, ita frustraneus conatus non sine majoris incommodi periculo est, hic aperire. Recensuimus præcipua

libelli contenta. Ut vero clarissimi Autoris mens tanto apertius intelligatur, de vexatissimis quibusdam inter Protestantes quæstionibus verba quædam ejus, Speciminis causa adscribemus. *De sacra Cœna* inter alia ita loquitur, Part. I. §. 44: Nos quoque opinionem illam Lutherorum, quod in Cœna Domini corpus Christi organo oris a dignis & indignis comedatur, sed non masticetur, vel in stomachum trajiciatur (sic enim mentem suam explicant) stipulam revera esse, concordia fidelium nil obstantem, inde colligimus, quia in examine conscientia & probatione nostri, in legitimo Cœnæ Dominicæ usu, protinus ita exuritur & evanescit; quando videlicet pia anima non, quid alii sumant, cogitat, sed ut ipsa digne, mystico videlicet & spirituali modo, per veram fidem, corpus & sanguinem Christi percipiat, allaborat. Otiosam ergo speculationem quandam de reprobatorum communione (de qua qui morosius disputant, perinde mihi facere videntur, atque Medici de homine mortuo disceptantes, an epotum pharmacum in eo vim habeat?) opinio illa continet, quæ fidei praxin in communione salutari, quam ipsis etiam Lutheranis concedimus, non impedit. Neque vero alia ipsorum, alia nostra est in examine illo, & probatione nostri ab Apostolo præcepta praxis; sed utrorum eadem est. Ex qua, si recta utri ratione velint, facile colligent, se magno in errore & rerum nostrarum ignorance hæctenus versatos esse, cum videlicet Christum a nobis excludi a Cœna, & nudis signis nos ludere, absque salutaris corporis & sanguinis Christi perceptione crediderunt. Æque ac Eckhartus *Fascic.* p. 510. 512. conqueritur de nobis, quod injuriam Lutheranis faciamus, dicentes eos statuere trajectionem corporis Christi in stomachum, consubstantiationem, synusiam, impanationem, aut localem inclusionem in pane, aut commixtionem cum pane. Non enim adesse corpus Christi physice & localiter, sed imperscrutabili modo. Wittenbergenses *ad Acta Colloq. Mompelg.* p. 76. neque ullum esse descensum corporis Christi vel visibilem vel invisibilem, Lutherus *Epist. ad Civitates*, asseruere. Licet ergo ignorance quadam circa modum loquendi aut suum aut nostrum teneantur, tamen nihil statuunt, ultra nos, quod velint tanquam articulum fidei obtrudere; quanquam illud, quod imperscrutabile esse dicunt, negare nolint. In articulo *de Gratia universali* ad objectionem, qua contraria de particulari sententia refelli maxime solet, ita respondet §. 64: Quod sine promissionibus absolute

absolute universalibus fidem in electis generari, & in tentationibus confirmari non posse, nonnulli obtinent, eo quod fides, seu individualis applicatio gratiæ ex particulari promissione ad paucos, non ad omnes relata, oriri nequeat; vix equidem pondus ullum habet. Non dicam, fidem salvificam generari non posse ex tali promissione, quæ ad infideles etiam & reprobos pertinet; cum id quod fidelibus & infidelibus, electis & reprobis commune est, fidei causa esse nequeat. An enim firmam fidem concipere possum, Christum Salvatorem meum esse, & mihi remissionem peccatorum ac vitam largiturum esse, quia verbi Divini absoluta promissio ad omnes & singulos, adeoque etiam reprobos pertinet? Sic enim vel reprobi etiam fidem salvificam concipient, & Christum suum Salvatorem apprehendent: vel absoluta promissio fidei causa non est. Principium ergo ab universalitate absoluta sumtum vagum nimis & remotum ac plane insufficientis est; imprimis cum consentiamus utrinque, nec suasionem moralem concipi, nec beneficia morte Christi parta & acquisita applicari per dictamen rationis, sed per solam operationem & efficaciam Spiritus S. absque qua, de gratia Dei, tanquam ad se pertinente, nihil homo statuere potest, nisi forte affirmare velit se Christi esse, etiamsi Spiritum Christi non habeat, contra Apostolum Rom. VIII, 9. Hæc autem Spiritus S. efficacia cum in omnibus non sit, asserta licet universalis gratia fidem homini cuivis in individuo solidam non faciet. Certius longe fidei & concipiendæ & firmandæ fundamentum est, si secundum ductam verbi divini universales propositiones cum suis restrictionibus & limitationibus, ubique fere & semper adjectis, componantur, atque sic applicentur. Cum ergo promissio universalis extet, quod Deus velit respicere eos, qui contrito corde sunt, quod velit quietem dare iis, qui fatigati sunt: quod æternam vitam dare velit omnibus qui credunt in filium in mortem traditum pro credentibus &c. ejus promissionis applicatio plane, cæteris paribus, fidem gignere & in tentationibus corroborare apta nata est. Atque eo sensu promissiones applicatas non particulares, sed universales, non contra sed secundum Evangelium, nempe credentibus omnibus factas, etiam Helvetica Confessio cap. X. profitetur his verbis: *Consoletur nos in tentatione predestinationis, qua vix alia est periculiosior, quod promissiones Dei sunt universales fidelibus.* Denique de perseverantia sanctorum in conventu Lipsiensi convenisse scribit

S. 67. fideles electos quosvis certos esse posse ac debere salutis suæ, non
 conjecturali tantum, sed infallibili fidei divinæ, cui subesse falsum non
 potest, certitudine. Pergit postea: Ita Hutterus in comp. Loc. XIII.
 q. 29. quærenti: An electi possint esse certi de sua perseverantia in fi-
 de? responderet: Imo certissimi. 1. Quia norunt electionem & salutem
 suam unice fundatam in Christo. 2. Quia Spiritus S. in electis habi-
 tat ut in templo suo, & (NB.) in iis non est otiosus, sed impellit eos ad
 obediendum mandatis Dei. Perhibet enim testimonium, quod sint
 filii Dei. 3. Quia certo sciunt, Deum se invocantes exaudire. Et
 Brochmannus Loc de fide justif. cap. 2. q. 20. clare, nostrorum, inquit,
 Theologorum certa & constans assertio est, quod homo vere fidelis
 certissimus esse possit, debeatque de peccatorum remissione, justi-
 tia & salute. Hoc fundamentum si constanter, & pressis manibus Evan-
 gelici retinuerint, non multum profecto litis supererit, quia sic & non
 perseverantes vere fideles nunquam fuerint, sed professi duntaxat &
 δοξασιμῶς tales, quibus illud Publii Syri quadrat: Fidem nemo un-
 quam perdit, nisi qui non habet: & fides subinde nutans, imo amissæ
 & expiranti similis, in solidum tamen, ratione puta & radicis & fructus,
 & præsentis & operationis seu sensus, amittetur & expirabit nunquam,
 quia eadem ratione etiam certitudo fidei & perseverantiæ in solidum
 amitteretur & expiraret. quod utrique nos constanter negamus.
 Et de hoc etiam quicquid sit, hoc unum in quæstione manebit, an fides
 & justitia, quam finaliter non deficere utrique consentimus, quæ in
 tentationum æstu non sentitur, neque operatur πρὸς καρπὸν, ad tem-
 pus, pereat, mox revictura tamen vividiusque se prolatura, an sopiatur
 duntaxat? Neutra hic opinio tanti momenti est, ut fundamento fidei
 convellendo par sit, quia utraque certitudinem fidei ac perseverantiæ
 finalis tuetur; & ad salutem vel damnationem æternam opinantis al-
 terutrius non multum adeo refert, an in tentationum æstu fides & Spi-
 ritus S. absit, an sopitus lateat, (cum absentis, sed mox redituri tamen,
 & sopiti ac non operantis haud grave adeo discrimen sit;) dummodo
 lætam mox, sive ex favillis, sive ex ætherea sua sede faciem suam denuo
 proferat, nubilis hisce dispulsis suavissimus Phœbus succedat, & tan-
 dem militantem, & varie jactatam electorum animam ad tranquillita-
 tis cœlestis portum perducatur. *Ex his de aliis iudicium capi potest.*

ARTICLES DE REUNION ENTRE LES
*Protestans de la confession d' Ausbourg, & les Refor-
 mez ; proposez par un Theologien de la Confession d'
 Ausbourg.*

id est

Articuli Reunionis inter Protestantes Augustanæ
 Confessionis & Reformatos, propositi per Theologum
 quendam Aug. Confess.

Roterodami, apud Abraham Acher, 1687. in 4.

Articuli isti, omisso Autoris nomine, in *duobus quaternionibus ma-
 joris formæ* Latine exhibentur, sub titulo *Conditionum pie unionis
 Ecclesiarum Protestantium*: Gallica versio e regione, in divisa additur
 paginæ areola. Proponuntur autem *primo* articuli XVIII *dogmatici*,
 nempe (1) de Deo & credendi principio. (2) de perduto generis hu-
 mani statu. (3) de philanthropia Patris. (4) de pietate erga Deum. (5) de
 sanctitate Dei. (6) de mysterio incarnationis. (7) de generis humani
 redemptione. (8) de pietate erga Redemptorem. (9) de conversione. (10)
 de justificatione & annexis. (11) de officio justificatorum. (12) de mise-
 rita relapsorum. (13) de sufficientia contritionis & fidei vivæ ad salutem.
 (14) de baptismo. (15) de sacra cœna. (16) de vera salutis causa. (17) de
 fructu bonorû operû. (18) de electione. *Dein* subjunguntur *Practici* VI,
 in quibus cavetur (1) ne ullius Ecclesiæ Protestantis status turbetur per
 vim, tumultû aut schisma. (2) ne Ecclesiæ ob ritus diversos gravi censura
 in publicis scriptis aut sermonibus privatis perstringantur. (3 & 4) ut eo-
 rum, qui dogmaticos illos articulos profitentur, sacra usurpari salva
 conscientia & fide possint, & ut solo nationum nomine distinguantur
 Ecclesiæ, v. g. *Evangelica Protestans Angliæ, Sueciæ, Saxoniæ, Belgii.*
 (5) ne de salute eorum dubitetur, qui capitales articulos credendo de-
 functi suat. (6) ut qui in aliis articulis (præter dogmaticos illos XVIII)
 hæsitant, titubant aut errant, fraterne doceantur, quomodo assertio-
 nes illorum cum verbo Dei & articulis illis virtualiter pugnent, admo-
 neantur etiam ut peculiarem sententiam suam in sinu reponant, inte-
 rim spe emendationis tolerentur. Articulos dogmaticos excerpe-

re, idem foret ac exscribere. Præstat eos legitimi editi sunt, stylo quidem plano & populari. Is tamen qui eos edidit, Reformatarum partium Theologus, collaudato Autoris studio pacifico, metuere videtur, ne Reformatis quibusdam multa displiceant, cum nihil, ut putat, hic remissum sit ex sententia August. Conf. Theologorum, sed pro fidei articulis proponantur etiam minima controversiarum puncta, quæ inter utramque partem ventilantur. Quod quomodo se habeat, lectoris iudicio permittimus. Existimat monitor, factum id esse ab autore ut privato, qui sibi convenire non existimaverit, suo arbitrato demere & circumcidere suæ communionis dogmata; sperari autem posse id futurum, si alii A. C. Theologi eodem pacis spiritu tractatum concordia aggrediantur; obtineri enim eam non posse, nisi mutuo aliquid relaxetur: si vero una pars alteri velit suam solum sententiam obtrudere, non alium reunionis modum extitutum esse, quam quem in Gallia Protestantes nuper experti sunt. Fatetur tamen idem, Articulum de S. Coena, qui maximum dissensus momentum faciat, tam sapienter & moderate conceptum esse, ut omnes acquiescere in eo possint. Est is, ut diximus, Artic. XV, in 14 puncta divisus, quorum priora sex, quæ questionibus inter partes accommodantur, speciminis veluti causa adscribemus: 1. Dominus noster Jesus Christus, benedictione præmissa, discipulis suis dixit, accipite panem hunc, edite illum, hoc enim quod vobis cum pane isto exhibeo, est corpus meum. 2. Hæc cum sint verissima: certe panis sacra mensæ benedictus est symbolum cum corpore Christi, modo tamen inexplicabili, conjunctissimum, eoque sensu vocatur ille ab Apostolo communio corporis Christi. 3. Nulli ergo non sacra mensæ hospiti præbet Servator noster, cum egregiis hisce cœlestis cibi potusque signis ac sigillis, cum pane, inquam, & vino benedicto, corpus ac sanguinem suum. 4. At præbet illa eo modo, quem Deus nusquam nobis revelavit, quem ille proinde nos scire ac definire noluit, ac consequenter mortalium nemo potest capere atque explicare. 5. Unde adeo universis convivis id incumbit, ut in sacri epuli usu ad animum sibi vocent, cum fiducia, desiderio, spe gratiæ, & precibus, corpus ac sanguinem Domini, velut thesaurum summum cum visibilibus elementis modo ineffabili communicatum; ut item mortem Domini celebrent cum gratiarum actione. 6. Quisquis tum piam Christi recordationem

prætermiserit, mortis reus erit sempiternæ, ob indignam symbolorum, atque pretiosissimi thesauri acceptionem. In reliquis quædam contra abusus Pontificios diriguntur, interque illa undecimum, ubi Autor dicit, *stultissime agere illos, qui ita consecrant, edunt aut bibunt, ut Deo per symbolorum consecrationem Christi mortem representent, quia nulla passionis Servatoris cum symbolorum benedictione & fruitione similitudo intercedit*, annotante editore Gallo, ita explicatum per epistolam ab Autore esse perhibetur, ut non neget sacramentum cœnæ dominicæ esse imaginem passionis Christi. Art. VII. de redemptione generis humani ita conceptus est: 1. Dominus noster Jesus Christus est Mediator Dei & hominum quorumcunque. 2. Dedit semetipsum antitypum verissimum pro universis ac singulis hominibus. 3. Præstitit enim vice generis humani exactissimum obsequium præceptis divinis, suscepit in se omnium hominum peccata, atque elevatus est tandem velut victima, imputatis alienis peccatis onusta & maledicti omni obnoxia, in crucem: ut universi qui crediderint habeant, ab æterno exitio liberati, certo certius vitam æternam, ut consequenter omnes & singuli deinceps victuri homines, dummodo fecerint hominis convertendi officium, convertantur, & dummodo crediderint, salventur. Huic correspondet Art. VIII. §. 1: proinde nos universi ac singuli reliquique mortales omnes, obstricti sumus, ut credamus Jesum Christum nostrum esse Salvatorem, ut idcirco in ipso confidamus, ac speremus, cum amemus, revereamur, celebremus, omnique obsequio deveneremur. Congruit etiam Art. XVIII. de electione: 1. Deo nostro jam ante orbem conditum omnia sua nota fuere opera. 2. Quam ergo ob causam, quem in finē, quoque modo Deus in tempore quicquam facit, procurat, permittit, eam ob causam, eum in finem, eoque modo, se id esse facturum, procuraturum, promissurum, decrevit ab æterno. 3. Proinde jam ante mundi fundamenta de temporaria sua beneficiorum gratiæ dispensatione sic penes animum suum constituit: Mittam filium meum proprium, quadagesimo post apostasiam generis humani seculo in carnem. Is per suam satisfactionem universis acquirat beneficia necessaria quæcunque; quisquis jam mortalium faciet officium hominis convertendi, justificandi, adoptandi, re novandi, conservandi (in fide & pietate) reparandi (ad contritionem & fidem post anaptofin) is convertetur, justificabitur ad-

„optabitur, renovabitur, conservabitur & reparabitur. Adduntur
subsumtionum exempla. Cætera, ut dictum est, ad ipsius scripti lectio-
nem remittimus,

JACOBI WVILHELMII IM HOFF NO-
titia S. Rom. Germanici Imperii Procerum, Hi-
storico-Heraldico-Generologica.

Tubingæ, sumpt. Joh. Georg. Cottæ, 1687. in 4.

CUM Nobilissimus operis hujus Author anno 1683 *Spicilegii Rit-
tershusiani* partem priorem, tres genealogicarum tabularum deca-
das complexam, evulgasset, simulque promississet libellum singularem,
quo quicquid Rittershusii Familiarum Germanicarum tabulis deesset,
affatim suppleretur; nil magis nos in votis habere, quam festinatam
illius editionem, in Actis istius anni p. 423. 424. professi sumus. Et
respondit sane expectatione citius votis nostris, dum anno sequenti
Tubingæ hanc *Notitiam Procerum Imperii*, tam *in folio*, quam *in octa-
va forma*, excudi curavit, eamque hoc anno denuo, *sed infinitis locis
emendatiorem & auctiorem* edidit.

Distinguitur opus hoc, quod nunc primum Authoris sui nomen
fronti adscriptum gerit, libris novem, quorum *primus* agit de Impera-
tore & familia Cæsarea, *alter* de Electoribus, *tertius* de Principibus ec-
clesiasticis, Archiepiscopis, Episcopis, Magistris ordinum Teutonici
& Johannitici per Germaniam, Abbatibus ad principale fastigium e-
vectis, Prælati aliis, qui curiatim suffragia ferunt, ac denique Abbatissis.
Quarto acceditur ad Principes seculares, & quidem antiquiores, quibus
libro *quinto* Principes in specie sic dicti adduntur. Reliquis *quatuor
libris* recensentur totidem Comitum ac Baronum scamna, *Wetteravi-
cum* puta, *Suevicum*, *Franconicum*, *Westphalicum*.

De tot tantisque communis patriæ proceribus eo pacto agit No-
ster, ut, quod *seculares* attinet, cujusvis familiæ primam originem se-
dulo inquirat, eaque inventa doceat, quoties & in quos ramos succes-
su temporis distincta, qua fortuna usa, quibus denique ditionibus ac
clientelis subinde aucta fuerit. Uti vero nusquam iis immoratur, de
quibus Rittershusius ea quæ par erat, dixerat; ita, quotquot illum fu-
gerant, aut post illius fata illuxerant, natales, nuptiales, emortuales dies

ac annos, summa industria undiquaque conquisitos, distincte ac copiose annotat. Utque primo intuitu liqueat, quænam anno 1684. (quæ primitus hæc commentatus fuerat,) in singulis ramis eminauerint familiarum capita, nomina eorum majusculis exarata literis extantiora reddidit. Subjungit tandem *Insignia Gentis* heraldice enarrata. Quod *ecclesiasticos* autem spectat, ante omnia moderni Præsulis nomen, titulos, parentes ac insignia commemorat; inde in episcopatus aut monasterii itemq; ordinum Teutonici & Johannitici historiam divagatur, ac quo hodie præsertim loco eorû res sint, quotve ac quosnam Canonicos anno 1684. aluerint, dilucide edisserit. Cumque tantum non omnes familiæ hoc triennio incrementa & decrementa non una habuerint, nec pauci Ecclesiasticorum procerum isto temporis intervallo vita functi fuerint, singulis fere paginis in recentissima hac editione aliquid accessit; cæterarum (quas per operarum festinationem suis locis reponere integrum Authori non fuit,) observationum sarrago amplissima in castrum voluminis cum indicibus locupletissimis personarum, insignium & rerum necessariorum rejecta est.

*SPICILEGII RITTERSHUSIANI PARS
posterior, sive Tabula Genealogica XXXX.*

Tubingæ, apud Joh. Georg. Cottam. 1685, in fol.

Idem autor est posterioris hujus partis, qui prioris, in Actis anni 1683 p. 423. memoratæ, nempe Nobilissimus *Jac. Guilb. Im Hoff*, Patritius Norimbergensis. Recensentur hac ipsa parte stemmata illustrium aliquot in utraque Germania, Hungaria, Bohemia, Polonia & Suecia familiarum, quarum nomina in Sylloge Genealogiarum Rittershusianarum frustra inquirens; non alia autem sunt, ac quæ sequuntur: Ab *Althann*, *Auerspergii*, *Bannerii*, *Bielke*, a *Blagay*, *Curlandiæ* Duces, *Egmondani*, *Esterbasi*, *Furstenbergii* Barones in Westphalia, *Gallenbergii*, *Greiffenklavii*, *Hornii*, *Jeveræ* & *Kniphasi* Dynastæ, *Ligniaci*, *Löwenhauptii*, *Lubomirskii*, de *Martiniz*, *Ochsenstierne* Comites, *Palsii*, *Radzivilii*, *Rappolsteini*, *Rosenbergæ* Comites, *Salmenses*, *Serimii*, *Slavate*, *Steinbockii*, *Tattenbachii*, *Wiesnowezii*. Præmittitur supplementum in illarum familiarum, quibus in *Notitia Procerum Imperii* nullus locus commode dari poterat, genealogias Rittershusianas, Comitum scilicet

Brabe, Dominorum *Brederode*, Burggr. & Com. de *Dobna*, Comitum de *Hardeck*, Comitum *Kevenbulla*, Ducum *Lignicensium*, Comitum de *Mørsberg*, L. B. de *Polheim*, de *Schallenberg*, *Schifer de Freyling*, Com. de *Stabrenberg*, Dom. de *Stubenberg*, Com. de *Traun*, Lib. Bar. de *Welz* & de *Zinzendorf*. Mantiffæ loco emendantur genealogia Comitum de *Windischgrätz* & L. B. ab *Egk*, in priore *Spicilegii* parte extantes.

JACOBI WILHELMI IM HOFF EX-
cellentium familiarum in Gallia Genea-
logia.

Norimb. sumptibus Joh. Andr. Endteri filiorum,
1687, in folio.

Amplissimam messem in Galliis invenit, cum *Rittershusii* industria vix unum alterumque *Spicilegium* in Germania reliquerat, Nobilissimus Autor. Duplicem autem familiarum Gallicarum classem sibi hoc opere illustrandam putavit; quarum alteram constituit *Regia stirps a Roberto Forti*, Hugonis Capeti proavo deducta, & cum omnibus suis, tam legitimis, quam naturalibus sureulis, tabulis XXVIII explicata. Cui accedunt in tabulis aliis viginti sex, stemmata *Principum extraneorum*, qui in Galliam sedem fortunarum transtulere, ibidemque jure indigenatus donati sunt, ut & illorum, qui Principibus extraneis dignitate pares habentur. Eorum nomina, si cupis, habe: *Duces Sabaudia, Lotharingia, Grimaldi, Turrio-Arvernenses, Rohanai, Tremollii*. Alteram classem absolvunt *Duces ac Pares Franciæ, Fuxii, Albrextani, Montmorancii, Crussolii, Jousani, (Joyeuse,) Nogaretio-Valletani, Condi, Levii, (de Levis) Hallvini, Gontalino-Bironii, Bethunii, Albertini, Bonii, Creguii, Sanlarii, Coffei, Richelii, Rupifulcaudii, (la Rochefoucaud,) San-Simoni, Caumontii, Estrai, Grammontii, Porteo-Mazariniani, (La Porte-Mazatin,) Neovillei, Rupichoartii, Bellovillei, (Beauvilliers,) Plessaco-Liancurii, Poterii, Noallii, Seguerii, Cambotio-Costinii, Choefeltii (Choiseul) Aumontii, Seneterrani, Sanmaurii (de Sainte Maure,) Guffierii, Albusonii, Brancacii, Gorrevodii, Bernonvillei, Hospit alii, Navallii, Arpajonii, Vetus-villei, (Viefville) Rupilaurii, Durforeii (Durafort) Dallonici, Claramontani (Clermont-Tonnere) Colinii, Harlei. Im-*

pendit

pendit Vir Nobilissimus *quingenta* harum illustriſſimarum gentium ſtemmatibus tabulas CIII. Imo majora adhuc moliebatur. Sed qua de cauſa ſententiam mutarit, ipſiusmet verbis edifferere placet. *Erat* (inquit) *mibi in animo, poſt Regum, Principum ac Ducum Pariumque genealogias, ſtemmata etiam aliorum ſago & toga illuſtrium virorum, illorum inprimis, qui officiis Coronæ, ceu vocant, ſunt functi, perſequi, atque adeo tertiam etiam ac quartam claſſem ſubjungere; a quibus equidem equo tandem animo manum ſuſtuli, cum de conſilio ſuo Polyhiſtor Germaniæ noſtræ longe clariffimus, Dn. Philippus Jacobus Spenerus ad me ſcripſiſſet. Illud enim omne præoccupare neſas arbitratus, perſum cum eo lubentiſſime partitus ſum.* Singularum autem Tabularum Genealogicarum paginis averſis inſcripſit *ſumma capita vitarum* Virorum cujuſvis familiæ celebriorum, quorum *natiuitas ſolum, conjugium, ac obitus* in Iſta tabula commemorata fuerant. Præmittit ubivis iconem *Scuti Gentilitii* ligno affabre inciſi, illamque Heraldice exponit. Nec ſilentio prætermittit, quicquid de prima cujuſvis familiæ origine inter Genealogos diſputari aſſolet. Uti vero Germaniæ noſtræ tantum civem non minus ingenio & induſtria, quam natalium ſplendore illuſtrem ex animo gratulamur: ita nulli ambigimus, quin Itali, Hiſpani, Angli, idem ſibi ab eo præſtari officium deſideraturi ſint, quali hæcenus de Imperii Rom. Germanici & Regni Francici Proceribus immortaliter meritus eſt.

JOANNIS HARDUINI DE BAPTISMO

Quæſtio triplex.

Parifiſi, apud Danielem Horthemels, 1687, in 4.

PRima quæſtio de Baptiſmo pro mortuis, verſatur in explicando loco Pauli I. Corinth. XV, quem Autor neutiſquam inter *δυσόνοτα* ejas collocandum cenſet, omnemque difficultatem ex duobus fontibus ortam arbitratur, tum ex veteri illo & vulgato novi foederis interprete, quem terimus; tum vero inprimis ex nimia eorum ſubtilitate, qui huic loco explanando incubuerunt. Propterea operæ pretium duxit, certas circumſcribere interpretandi quinque regulas, & ad eas veluti ad normam certiffimam varias variorum interpretationes exigere. Quo facto ſuam cenſoriæ ſubjicit virgulæ, quæ eo redit, ut *baptiſmum pro-*

per

pter mortuos, sive occasione mortuorum, a Paulo significatum tradat. Vult quippe, Corinthios eo anno morbum invasisse, quo grassante diem plurimi supremum obibant, & in iis haud pauci eorum, qui, ut Pacianus ait, ad altare veniebant indigni. Quamobrem ingruentis lethi metu, τῷ φόβῳ τῶν νεκρῶν, propter mortuos, sive occasione mortuorum, ὑπὲρ τῶν νεκρῶν, quorum maximus numerus fuit, baptismo alii ut tingerentur orabant. Quo illi studio prospicere sibi se in futurum significabant: & quo minus restare viæ videbatur, hoc sollicitius viaticum alterius vitæ quærere &c. Hanc suam sententiam multis argumentis confirmat, nec despiciatui fore confidit. Primum, quod ante a se præstitutis explanandi hujus loci legibus ac regulis ad amissum congruit. Deinde, quod est plana atque expedita. Tum quod & subsequentium ætatum exemplo, & consimili Augustini effato fulcitur ac niitur. Denique quod accommodatam quam maxime ad propositum ostendit Pauli argumentationem.

Secunda quæstio *de baptismo in vino* ex responso, quod Stephanus II Papa anno DCCLIV in Carisiaco villa, Gallicanæ Ecclesiæ Antistitibus dedisse fertur, originem trahit. *Harduinus rejectis binis respondendi modis* (quorum neuter de historiæ fide dubitat, sed alter quidem casu necessitatis Stephanum vult compulsum, ut vinum aquæ substituendum decreverit, ubi ea non inveniatur; alter depravatam esse textum & corrigendum clamat:) tertium forte sibi oblatum defendit, statuitque, e novendecim capitulis, sive responsis, quæ Stephano adscribuntur, decem omnino supposititia esse: ista videlicet, secundum, tertium, quartum, nonum, decimum, undecimum, (quod est de Baptismo in vino) duodecimum, decimum tertium, decimum quartum, & decimum octavum. Sex deinde ex iis ipsis, nempe nonum, decimum, undecimum, duodecimum, decimum tertium, & decimum quartum, Siricio Papæ primum dolo malo attributa, tum pari scelere atque audacia Stephani responsis corpus illud insertum, ac veluti purpureo panno centonem astutum. Hanc autem fraudem corruptionemque sub Gratiani Monachi tempora collocat, cui fuere hi canones suppositii ob eam causam incompti; additque vetustissimos codices manu exaratos, qui eos exhibent, ætatem eam adeo non antecedere, ut vix assequantur.

Tertiæ quæstioni *de Baptismo in nomine Christi* ansam dedit responsum

Sponsum Nicolai L. ad consulta Bulgarorum, cui enodando alia etiam similia Lucæ in Actis & Ambrosii loca Auctor proponit, eaque ita interpretatur, ut non in Christi modo, verum etiam in Trinitatis nomine baptizari, unum & idem existimatum sit, atque post confessionem utriuslibet baptizari; quæ fiebat in redditione Symboli arte baptismum. Ut adeo verba illa, *baptizari in nomine Christi*, non ad formam baptismi, ut vulgo fit, sed ad confessionem baptizati referenda veniant. Dehinc prolixè disputat, alia forma verborum, quam quæ est a Christo Domino præstituta, vix unum alterumve hominum genus in tota antiquitate usum reperiri; & quæ de hæreticis ex Concilio Nicæno, Gregorio, Innocentio, aliis, objici solent, quomocunque potest, ad suam opinionem inflectere satagit.

NOVISSIMA IDEA DE FEBRIBUS &c.

auctore Jacobo Sylvio.

Dublino, apud Jos. Rey, 1686. in 8.

Paradoxa in plerisque Auctoris opinio de febribus est, quam pro instituti ratione pertransennam modo videre aggredimur. Præmittit fusius naturalis status descriptionem, asseritque sanitatem in regulari commistione & unione particularum insensibilium chyli & sanguinis consistere, ita ut interveniente materia subtili & aere, blanda illarum pereat commotio. Hæc vero (quam fermentationis, effervescentiæ, agitationis vocabulo promiscue effert) prout major vel minor sit, eo magis expandi cordis parietes. Quo magis hi expandantur, eo majori impetu a corde sanguinem prosilire, & antecedentem in arteria magna propellere. Quo major quoque sanguinis effervescentia, eo citatiorem quoque respirationem esse, & vice versa. Quo hæc frequentior, eo plus aeris invehì, unde major commotio sive rarefactio sanguinis, atque ex hac major resistentia contra atmosphæræ pressuram oriatur, sicque velociori motu cruor feratur. Hinc invaletudinis, imo febrium causam ponit irregularem particularum in sanguine mistionem, & perturbatam earum commotionem. Hanc vero longe minorem in febribus judicat, ob materiæ subtilis ingressum per lineam rectam præpeditum. Tum sanguinem asserit minus intumescere, minusque sic resistere atmosphæræ compressioni. Ac cum hoc modo strictior ejus compages evadat, minus expandi cordis pa-

rietes, minori impetu sanguinem inde expelli, lentiore ipsius progressum fieri. Hinc mechanica ratione, ait, clarum existere, quod pulsus debeat evadere frequentior. Nam cum sanguis minus intumescat, necessario cor cum annexa arteria crebrius constringi debere. Id quod e contrario liqueat; nam si sanguis rite intumescat, cor magis expandi. Ad majorem vero sive integram ejus expansionem longius temporis spatium requiri, quam ad minorem sive mediam, sicque pulsum omnino tardiozem fieri. Præterea vel ideo quoque cor & arteriam frequentiozem edere pulsus, quod cum sanguinem in febribus multas ob rationes crassiozem ac viscosiozem nequeant una pulsatione propellere, crebris ac iteratis pulsibus protrudere allaborent. Falli itaque auctores turpiter, qui majorem sanguinis rarefactionem & circulationem citatiozem ex pulsu frequenti velint indicari; in hoc saltem veridicos, quod pulsus quam pro natura frequentiozem, febris signum constituant pathognomonicum, cum omni, soli & semper competere deprehendatur. De cætero symptomata duo palmaria in febribus observabilia, calorem scilicet & frigus, explicans fusius ostendit, ad essentiam illarum hæc non pertinere, sed pro effectibus solum habenda. Simul quomodo ex frigore calor emergat, prolixius exponit; utriusque vero majorem in partibus sensum sive perceptionem, ex tardiori circulatione sanguinis, adeoque hujus diuturniori in hæsiõne deducit. Sic a frusto glaciẽ, parti cuidam corporis affricto, exiguum frigoris sensum produci: longe majorem vero, si plane in hæreat. Pariter carbonem ardentem sive prunam raptim digitis attolli posse, lente non posse. Ignem enim subtilẽ ac transeuntem non lædere, nec caloris sensum inferre, quod de crassioze ac permanente non liceat asserere. Falsissimum itaque pronuntiat, quod calor in febribus auctus, urina intensius tincta & pulsus frequens, velociorem sanguinis motum queant indicare. Ac quinque argumentis probat, corpus liquidum cito moveri posse, & tamen non existere calidum: & contra, calidum esse posse, nec tamen velociter moveri. Reliqua in febribus occurrentia symptomata ad unum omnia ex perturbata sanguinis particularum mixtione, sed diverso modo, explicat, ita ut aliter sitis, aliter capitis dolor, anxietates præcordiorum, vomitiones, nausæ, diarrhoeæ, vigiliæ &c. producantur. Hinc de periodo febrium status horum redeuntium differens, majorem vel minorem materiæ glandulas ventriculi,

triculi, intestinatorum, & forsā etiam pancreatis, obstruentis visciditatem, & humoris stagnantis pro moræ diversitate majorem vel minorem aciditatem accusat. Citius vero vel tardius paroxysmorum reditus inde credit determinari, febresque continuas existere, quando tam cito se subsequantur, ita ut altera nondum remiserit, quando altera incipit. Curationem denique explanaturus, erroneam methodum per refrigerantia, humectantia, phlebotomiam, & cathartica rejicit. In specie, si refrigerantia necessaria adeo sint, quærit, cur febricitantes non frigido aeri exponantur? aut cur inde lædantur? cur ægri ardore summo afflicti in lecto calido detineantur? cur in malignis non frigida, sed sudorifera præscribantur? cur e contrario vehementer calida, ut piper, caryophylli, euphorbium, spiritus vini &c. febres curent? Itaque ad inducendum corpori ex febre æstuanti frigus, & siccitatem tollendam, non frigida & humectantia, sed calefacientia potius in usum vocare jubet, imo attenuantibus & temperantibus rem totam absolvere. Commendat in hunc finem salia lixiva volatilia & fixa, item spiritus volatiles vel puros, vel aromaticos, nec non oleosa, ut aromatica olea stillatitia &c. *modumque operationis eorum quoad cuncta febrium symptomata superius commemorata, ad mentem Cartesianorum fusius explicat.* Camphoram vero, tanquam naturale sal volatile oleosum sine pari ac perfectissimum extollit. Huic plurimum assimilari sperma ceti (quod gummi vel bitumen mari extractum pronuntiat) arbitratur. Spiritus salis ammoniaci vero omnibus sibi hæctenus notis aromaticis præfert, ad edomandum acidum in febribus semper peccans & in perturbata sanguinis mixture occurrens. Formulam præscribendi ex reliquis unicam modo hic inferemus:

Recip. Vini Canarin. vel aquæ Ment. ℥iv.

Elixir vit. aromat. vel aqu. vit.

Matth. aut cujusvis aromat. ℥j.

Sp. Theriac. Camphor. ℥i℥.

Salis vol. oleosi gutt. xxv.

Diafcor. Sylv. ℥j.

Antimon. diaphor. vel bez miner. gr. xxx.

ocul. cancri ℥j.

Spermat. cet. ℥ij.

Salis tartari ℥j. &c.

M. & pro re nata addendum monet vel oleum quoddam stillatitium, vel aliquid camphoræ loco salis volatilis oleosi. De hac mistura singulis horis capiendum susdet cochleare unum, donec sudores erumpant, unde melius habituri sint ægri, quod circulatio sanguinis liberior fiat. Cæterum phlebotomiam & cathartica parum damni, parumque juvaminis afferre posse cum Borello statuit, quod qui similia adhibent, neque facilius curentur, neque moriantur, quam illi qui plane talia in auxilium non vocant. Negare tamen non præsumit, in quibusdam forsan Epidemiis aliquid inde utilitatis expectandum fore.

Ad ultimum annexa est huic tractatui dissertatio de insensibili transpiratione, in qua ipsius definitio, origo sive causa, necessitas & rationes, tandemque usus investigantur. Prolixitatem vitaturi unicuique hoc afferimus, quod Auctor probare nitatur, sub effervescentiæ motu continuo quasdam particulas ex misti compage aquosas, spirituosas &c. avolare & exhalare. Ab his vero aerem propellentibus necessario materiam subtilem cogi ex tubulis aeris discedere, & loca exinanita particularum jam exclusarum iterum occupare. Cumque singulæ corporis partes succo nutritio perfusæ sint, hic autem effervescat; atque effervescencia nulla sine evaporatione, ut didicimus, contingat, consequi inde omnino, quod transpiratio fiat in qualibet corporis parte. Hinc postquam Sanctorii sententiæ subscripsit, plus scilicet in die naturali insensibiliter per poros cutis diffilari, quam per urinas aut alvum egeratur, concludit quod transpiratio arctissime cum sanitate conjuncta sit, ni absolute hanc ab illa dependere velimus admittere. Hoc vero quotidianæ experientiæ testimonio putat confirmatum, dum ab impedita transpiratione, vel alterata ejus periodo, cujusque generis ægritudines exoriri observentur.

GULIELMI ROBERTSON, A. M. THE-
saurus Lingua sanctæ.

sive,

Concordantiale Lexicon Hebræo-Latino-
Biblicum.

Londini, impensis Thomæ Savvbridge, 1686, in 4.

Varia

Varia extant *Lexica Hebræo-Biblica*, quæ celebriores Christianorum Judæorumve Philologi indefesso studio, at impari successu, congesserunt. Ex his par Rabbinorum Arabum *Abuvalid* & *R. Tanchum Hierosolymitanum*, præeunte celeberrimo *Pocockio*, laudavimus *Aëtiorum anni superioris* p. 577. 578. 579. Horum utrumque si typis excubiri curarent Angli, magnum apud eos, qui Ebræa penitus nosse aut valent, aut cupiunt, beneficium ponerent. Tacemus alios *ἀνεδότας*, quorum nomina apud *Buxtorfium*, *Plantavitium*, *Bartoloccium*, *R. Schabtai*, in Bibliothecis, quas singuli ediderunt, Rabbinicis legere est. Caremus illorum usu eo æquiori animo, quod jacturam abunde resarciat *R. Davidis Kimchii Sepher Schoraschim*, h. e. LIBER RADICUM seu *Lexicon*, quod secundam partem *Sepher Michlol* sive Operis Grammatici constituit. Editum id est *Neapoli* anno Æræ Judaicæ contractionis 250, i. e. Christi 1490; *Constantinopoli* a. 273, Christi 1513; *Venetis* a. 307, Christi 1547, ac suffragiis Eruditorum utriusque gentis tantum non omnium, inter similis argumenti libros principatum facile obtinuit. Fuerunt tamen, qui nec in tantum nomen censoriam expedire virgulam veriti sunt. Illos inter *R. Samuel Ben R. Latipb*, (cujus curæ editionem Neapolitanam debemus,) omnia illa Scripturæ loca, quorum lectio a vulgata Masoretharum abscedebat, e Kimchio temere expunxit, qua de re legisse non poenitebit *Claudium Capellanum*, *Marris* Rabbinici infidi parte I. capite tertio. Alter est *R. Joseph Caspi*, qui *Scharfchoth Kesepb*, *Catenas Argenteas*, seu *Librum de Radicibus Hebræorum* nondum editum, teste *R. Schabtai*, conscripsit, Kimchiumque quavis arrepta occasione refellere studuit. Addatur *Don Jsaac Abarbanel*, qui præfatione in *Prophetas Minores*, fol. 224. col. 2. illum in *Commentariis Prophetis* plagii, quo in *Abenesram* injuriosus fuerit, postulavit, suspicionemque simul suggessit, nec in *Lexico* istum a crimine hoc sibi omnino temperasse. Verum quicquid hujus sit, id saltem extra controversiam esse videtur, vix ullum Christianorum, si absque Kimchii opera fuisset, tantæ molis opus aggressurum fuisse. Contra vero, ex quo illius scripta Christianorum manibus teri cœperunt, quamplurima ad illius exemplum *Lexica Hebræo-Latino-Biblica* concinnata novimus, authoribus *Sante Pagnino Lucensi*, (cujus lacunas suppleverunt *Job. Mercerus*, *Antonius Cevallerius* & *Bonaventura Cornelius Bertramus*) *Johanne Forstero*, *Johanne Avenario*, *Marco Marino*

Brixiano, Joh. Buxtorfio, Nic. Petrao, Joh. Plantavittio, Joh. Coccejo, Eduardo Leighio, aliis, quorum catalogum Maxime Reverendus Augustus Pfeifferus noster texuit Critices Sacrae cap. V. §. 10. Nullum tamen hactenus Lexicon lucem aspexit, quod non laboraret defectibus nonnullis, quos laudatus Pfeifferus anno jamjam hujus seculi septuagesimo nono tum in Epistolica Consultatione, tum in Critica Sacra cap. V. Qu. X. operose exposuit; constat vero, Eruditos maximæ famæ non unos Virum tanto oneri ferundo aptissimum publico nomine per literas rogasse, ut ipsemet ad Ideæ illius suæ normam lexicon adornaret faceretque juris publici. Utinam autem ei per concatenatos labores Ecclesiasticos Academicosque liceret, votis illorum propediem assurgere. Tunc quippe profecto haberemus, quod thesaurum quovis auro cariorum Orbi Literario impense gratularemur.

Interea vero dum hujus spe tenemur, non ingratus est hic Gul. Robertsoni *Thesaurus*, laude certe sua non indignus, utpote in quo *Lexica Hebraica hucusque edita omnia, Buxtorfisque Concordantias Hebraicas, methodice, succincte & quasi synoptice exhibere voluit.* Sub quavis enim radice non tantum omnes conjugationum & nominum formas, simplices atque compositas adducit, sed & ad singulas annotat locorum Scripturæ univerforum, (ubi illa legitur,) non verba quidem, librum tamen, caput & versum. Sed & e re Hebraicæ linguæ cupidorum sine dubio fuisset, si eadem methodo, qua voces flexibiles explicatas dedit, de inflexibilibus etiam *particulis* Hebraicis agere non abnuisset, quarum aliquas quidem, easque biliteras & trilateras, evolvit, sed, uti videtur, nimis succincte: unilateras autem plane neglexit. Illius vero causam vix aliam fuisse opinamur, quam quod fuerit destitutus *Concordantiis Particularum Hebraeo-Chaldaicarum Christ. Noldii*, Theologi Hauniensis, opere summi (si quid judicamus) laboris atque ingenii. Additi sunt singulis vocibus Commentarioli ex *Kinzchio, Aben Ezra, R. Salomone, R. Levi, R. Mosche, Abarbenele*, item Lexicographis *Munsterio, Pagnino, Forstero, Avenario, Mercero, Cevalerio, Buxtorfio, Coccejo* deprompti, quibus sensus vocum rariorum aut anomalarum, (a quo sæpe totius versus interpretatio pendet,) hic illic declaratur. Cæterum eximiam agnoscimus industriam Auctoris, qui absq; ullo vivo præceptore Ebræam & utramque Aramæam linguam addidicisse se refert in *Postscripto*, seu *Paranesi ad Lingua Hebraicæ studia*, quæ sub-

juncta

juncta olim *Theſauro lingua Græca referato* abs illo ante quadriennium edito, nunc vero sub finem quoque Lexici Hebraici recusa cernitur. Sequitur ejusdem

GULIELMI ROBERTSON MANIPULUS
Lingua Sanctæ & Eruditorum.

Cantabrig. typis Johannis Heyes, 1686, in 8.

Quatuor partibus *Manipulus* hic absolvitur. Prima parte habetur *Index Alphabeticus Hebræo-Biblicus ad Concordantiæ Lexicon Hebræo-Latino-Biblicum nuper editum, in quo voces defectivæ & anomala ad proprias radices reducuntur, ut facilius in Lexico reperiantur.* Altera agit de *Accentuatione Hebræo-Biblica*, tum prosaica, tum metrica. Tertia de *formatione verborum*. Ultimam constituunt *sententia Hebræo-Latina Biblica triginta duæ, in quibus exempla præcipuarum anomaliarum extant, publicatæ olim hoc ordine a Victorino Bythnero, nunc vero pro praxi Lexicon de vocibus difficilioribus consulendi, adjectæ.*

LEXICON NOVUM HEBRÆO-LATINUM
ad modum Lexici Schreveliani Græci compositum &c. adauctum Lexico Chaldaico-Biblico a Johanne Leusden.

Ultrajecti, apud Franc. Halma, 1687, in 8.

Duæ voluminis hujus partes sunt. Altera complectitur Indicem Hebraicum Gulielmi Robertsoni, (de quo, ceu prima parte *Manipuli Lingua Sanctæ*, modo diximus,) novo nunc titulo *Lexici Hebræo-Latini & interpretatione Latina vocum Hebræarum a Job. Leusdenio donatum.* Alteram absolvit *Lexicon seu index vocum Chaldaico-Biblicarum, eodem filo, ac Hebraicus Robertsoni, ab ipso Leusdenio pertextus.*

JOHANNIS CHRISTOPHORI SCHAMBOGEN,
J.U.D. & S. Cæs. Maj. Consilarii, &c. Prælectiones publicæ in Justiniani Institutionum Juris IV Libros compositæ.

Neo-Pragæ, typis Joh. Nic. Hampelii, 1687, in 4.

Secunda

SECUNDA nunc vice in publicum prodit præfens ad Instituta Justiniana commentarius, a Consultissimo Autore antehac in Universitate Carolo-Ferdinandæ Pragensi auditoribus in calamm dictatus, ac dein anno 1676 primum in lucem editus. Egit in eo non id solum, ut prima juris principia perspicue ac distincte proponeret, dubiaque ex apparenti textuum pugna subinde nata resolveret, ac alias quæstiones frequentius apud juris interpretes obvias decideret; quæ singula scilicet jam antehac a plerisque aliis commentatoribus pertractata reparari possent: sed & speciatim in eo occupatus fuit, ut patrii juris, Bohemici puta, notitiam aliqualem suis in tempore una imprimeret, nec vicinæ Saxonæ statuta, sicubi a communi jure discederent, allegare omitteret. Brevisimis tamen verbis utrumque horum præstitit, & plerumque non nisi remisive, dubio procul, ut auditores ad ipsarum Regni legum evolutionem melius adsuaceret. Ut autem secundum ea, quæ ab Autore adducuntur, in plurimis capitibus Bohemæ jura cum Justinianæ legibus amice conspirent; haud pauca tamen vicissim deprehendere licet, in quibus manifeste satis ab invicem discedunt: quorsum v. g. pertinet, quod in Bohemia minorennitas vigesimo anno terminetur; quod certa tutorum species detur, qui patriam potestatem habere dicantur, nec inviti rationes reddere cogantur; quod subditus absque scitu Domini vel capitanei sui, ultra 3 s. Bohemicos mutare vel fidejubere efficaciter nequeat; quod quantitas legitimæ determinata non sit, (pro tertia tamen plerumque decidi ait,) quod patre consentiente filius familias valide testamentum condat; quod contra fiscum ne quidem immemorialis currat præscriptio; quod, si creditor prius conveniat principalem debitorem, hoc ipso fidejussor liberetur, quodque fidejussoria obligatio morte fidejussoris expiret. Quemadmodum vero ipsum jus Bohemicum non uniforme est, sed in municipale & provinciale dispescitur; quorum illud Bartolum de Saxo Ferrato, a Carolo IV. eapropter Pragam evocatum autorem habere dicitur, & statui civico pro norma ac regula propositum est; hoc vero, nempe Provinciale, (renovatum & editum a Ferdinando II. anno 1627. 10. Maji, ac dein adauctum Novellis declaratoriis Ferdinandi III. anno 1640, 1. Febr. junctim publicatis,) eos imprimis concernit, qui altioris status sunt: ita Autor noster distinctionis hujus sedulam ubivis rationem habuit, indigitando, quid provinciali, quid municipali jure

cautum sit, cum utriusque haud levis aliquando discrepantia occurrat. Sic jure municipali pubertatis terminus in foemina est annus 15, in masculo 18; at jure provinciali 20 demum anno mas pro pubere haberi fertur: jure municipali nuptiæ, absque parentum consensu initæ, sunt legitima exheredationis liberorum causa; jure vero provinciali non item, nisi insuper Judicium Provinciale a Testatore super ea re in consilium adhibitum fuerit: jure municipali testamentum valide fit coram duobus testibus, aut etiam sine testibus, modo indubie a testatore scriptum aut subscriptum saltem sit; at jure provinciali, etiam si propria manu scriptum sit, requiruntur tamen insuper testes quatuor altioris status; aut certe, si hi deficient, ut quinque alii bonæ famæ viri subscripserint ac subsignarint, opus est. Præterea & hæc in specie ad jus municipale referenda sunt, quod sorores ad tutelam admittuntur: quod is pro herede habetur, cui plurimum in testamento relictum est: quod is, qui ab actione semel mota per annum & diem destitit, postea non amplius auditur: denique quod, etsi regulariter ibi dotalitium soleat esse tertia pars ultra dotem, sic ut v. g. quæ 100 intulit, capiat 150; nihilominus, si viduus virginem ducat, teneatur eam in duplo contradotare, ut ita, quæ dotem tulit 100 aureorum, dotalitii nomine 300 capiat. Atque hæc quidem de jure Bohemico allegata sufficiant: de his enim, quæ ex jure Saxonico æque ac communi afferuntur, cum in vulgus nota sint, dicere nil attinet. De cætero, quemadmodum hic Autoris consultissimi labor antehac ab ejusdem auditoribus cum applausu fuit exceptus; ita quin eundem porro apud lectores etiam ob ordinatam probe & perspicuam in docendo methodum sit promeriturus, nulli dubitamus.

ABRAHAMI HEIDANI CORPUS THEOLOGICÆ Christianæ.

Lugd. Bat. apud. Johann. de Vivie &c. 1686, in 4.

PRælectiones Academicas suas, ex quibus hic liber natus est, Heidanus ipse, cum adhuc in vivis esset, licet sæpe rogatus, ad incudem revocare & in lucem edere noluit; ne ut editor Carolus Crucius, professione Jctus, illius nepos ad Lectorem præfatus fatetur, in se irritaret eos, qui lites aliis ex minima sententiarum disparitate, vel ex solo livore

graves & molestas movent. Quibus sine dubio ea respicit, quæ Heidanus partim ex principiis Philosophiæ Cartesianæ, partim ex hypothesebus Coccejanæ Theologiæ passim in Systemate suo docuit. Enim vero illa nova dogmata non valde occulta habuit, sed publice etiam proposuit in disputationibus, ac defendit adeo constanter contra interdum Curatorum Academiæ Leidensis, ut ab officio Professorio tandem deponeretur. Annotamus autem in Corpore, quod præ oculis habemus, Theologiæ Christianæ, Cartesianismum sapere; *ideam DEI nobis esse innatam; nihil in DEO dari actu infinitum; recte dici, DEUM crassina die incipere esse; de DEI existentia in philosophia dubitari posse; mundo non esse affingendos terminos; propter hominem alia omnia non esse facta; principium, cogito ergo sum, esse omnium primum in philosophia; hominem sine corpore manere hominem, i. e. substantiam intelligentem; & alia, quæ præmittimus.* Coccejanæ sunt assertiones: *opus Spiritus S. in federatis sub veteri Testamento, non fuisse fiduciam in libertate filiorum DEI, sed servilem famulationem: non contigisse fidelibus V. T. plenam peccatorum remissionem, i. e. ἀφεσιμ, sed solam τάγεσιμ i. e. dissimulationem in convivia DEI.*

In cæteris antiquum rigorem Reformatorum servat. Nam & Supralapsariorum sententiam acriter tuetur, & distinctionem inter sufficientiam & efficaciam mortis Christi refellit, & gratiam universalem, itidem ab iis, qui inter illos pacem & concordiam ecclesiasticam nobiscum suadent, assertam explodit. Integrum opus in duos tomos distributum est. In primo continentur Loci septem; (1) *de Theologia & Sacra Scriptura;* (2) *de DEO & Trinitate;* (3) *de decretis DEI, ubi de Prædestinatione;* (4) *de Creatione;* (5) *de Providentiâ actuali;* (6) *de Peccato & viribus liberi arbitrii post lapsum;* (7) *de Mediatore, ejus statibus & officiis.* Tomus alter comprehendit Locos octo, (8) *de Fœdere Gratiæ, ejusque dispensatione sub Vet. & N. T.* (9) *de Satisfactione Christi pro peccatis;* (10) *de Vocatione hominum ad Salutem, ubi de Gratiâ;* (11) *de Justificatione & adoptione;* (12) *de Sanctificatione & Libertate Christiana;* (13) *de Ecclesiâ;* (14) *de Sacramentis;* (15) *de Homine novissimis.*

JACOBI BERNOULLI, MATHEMATUM
Professoris Basileensis, Gemina Appendix ad Examen
Perpetui Mobilis, in festum m. Decembri Actorum anno 1686.

Priorem harum Appendicum a clarissimo Autore submissam, in eun-
 te Januario presentis anni accepimus: quo ipso & December Novello-
 rû Batavarû ad nos perlatas, machina a D. Papino & Pujola impugnatae
 defensionem, ab Autore suo susceptam, nobis exhibuit. Non ingrata er-
 go Appendicis Autori fore putavimus publicationis eousq; moram, dum ipse
 de novo hoc responso quantocyus certior redderetur, una fortassis opera ite-
 rato Machinae defensione examine defuncturus. Sed dum scheda Batavae
 Lipsia Basileam perferuntur, ejusque litera, segnius a latore curata, ad
 nos remeant, unus & alter mensis lapsus est; ut priori Appendici, Auto-
 ris voto mense Aprili publicanda, altera superveniret, junctim nunc cum
 illa publicanda. Ceterum quae in Novellis Batavis, mensibus Majo,
 Junio, Septembri & Decembri A. 1686, pag 577, 671, 1004, 1378. in u-
 tramque partem de perpetuo hoc mobili disceptata sunt, vel ideo huc trans-
 ferre negleximus, quod ea in compendio referant Appendices Ber-
 noullianae. Sic autem illa:

I.

Mirabitur procul dubio Lector, quod postquam materiae in diver-
 sis Eruditorum Actis ad ventilandum propositae satis diu inter
 Doctos agitatae fuerunt, ego de novo & postliminio quasi earum exa-
 men aggredi soleam, prout jam aliquoties usu mihi venit. Sed mirari de-
 sinet, cum perceperit, Acta isthac sero admodum, nempe Novellas
 Reip. Lit. Actaq; Lipsiensia bis duntaxat in anno, Parisiensia elapso demum
 anno, Londinensia nunquam ad manus nostras pervenire, iterumque
 aliquot praeterlabi menses, priusquam Actorum Collectores schedarum
 mearum fiant participes. Transmiseram illis, instantibus ultimis
 nundinis Francofurtensibus, Examen alicujus Perpetui Mobilis in
 Novellis publicati, iisdemque demum finitis perlati ad nos Menses
 Novell. Aprilis, Majus, Junius, e quibus a D. Papino & D. Pujolas in
 examine istius Machinae praeventum me esse cognovi. Sed quoniam
 diversam ab illis in hoc negotio viam inivi, nolo campum hunc prius
 deserere, quam quae praeterea tum circa utriusque responsionem, tum
 circa instantias Auctoris Machinae notanda mihi occurrerunt, publico
 impertivero.

Omnes tres in eo convenimus, quod in istiusmodi Folle, qualem
 proponit Auctor, nulla sequi possit alarum expansio, vel mercurii de-
 scensus. Ad hoc ostendendum illi quidem tum pondus mercurii in-

clusi, tum partem pressionis atmosphaericae, quae mediante tubo mercurium inclusum afficit, junctim contemplantur: ego seposita hujus accessione Follem ut undique clausum consideravi, ostendique, solius inclusi mercurii pondere alas Follis dilatari non posse; quo ipso satis refelli puto Auctoris opinionem, saltem illam, qua persuasum habet, per hydrargyri descensum in Summitate Follis vacuum genitum iri: ut maxime enim pressio illa accessoria & digitorum mercurialium juncta ponderi inclusi hydrargyri, tanta supponeretur, quae dilatando Follis sufficeret; ista tamen tunc dilatatio produceretur non per subitaneum hydrargyri lapsum, sed per ejus detractionem, succedente continuo per tubum alio mercurio, qui vacuum fieri impediret. Sed hoc obiter; neq; enim vacuum ad experimenti successum necessarium esse existimo. Responsio interim Papini huc redit: pressionem, quam Atmosphaera exercet intra follem, a longitudine intervenientis tubi plus diminui, quam augeri eadem possit a pondere mercurii inclusi. Si quaras qui hoc fieri queat, cum diminuatur 22 tantum, augeatur vero 40 digitis mercurialibus; adjicit ille, asserti sui veritatem facili subduci posse calculo: qua sua responsione ansam mihi praebet suspicandi, quod existimet, inclusum mercurium in follem agere pro ratione solius suae molis sive ponderis; cum evidens admodum sit, si solam spectes molem, pyramidem 40 digitos altam minorem esse primate in eadem quidem basi, sed altitudine 22 digitorum constituto: meus namque veriorque calculus, qui alas follis pro gemino vecte habet, viresque inclusi mercurii in premendis alis aestimat ex rationibus ponderum simul & distantiarum, tametsi satis planus sit & facilis, non tamen usque adeo obvius est, quin meruisset apponi a Papino, si huc digitum intendisset. Cum itaque non apposuerit, omnino conjicio, in hac illum sententia esse, quod in folle undique clauso non nisi triplo major, quam 27 digitorum altitudo requiratur, ad constituendum aequilibrium inter mercurium & externum aerem; cum ex calculo meo nupero pateat, quadruplo majorem in illo altitudinem deposci. Id eum in finem moneo, ut constet, quod si parva illa & digitorum accessio, qua vires inclusi ponderis augentur, juxta Papini calculum, dilatando folli 40 digitos tantum alto non sufficiat, multo minus illa in mea hypothese effectui huic producendo suffectura sit. Ex dictis autem porro liquet, mirum non esse, quod responsio D. Papini minus satisfecerit


Auctori Machinæ, qui duo regessit; quorum alterum (nam in priori, quod mutationem quarundam partium machinæ concernit, fateor me ejus mentem non assequi) huc redit, quod Follis utique non dilataretur, si mercurius in illum ageret pro ratione molis suæ more corporum solidorum, non vero pro ratione altitudinis, ut solent liquida; centies namque se expertum esse ait, si follis superne apertus intra liquidum aliquid aliquousque demergatur, accidere, ut liquor internus vel ad eandem cum externo se componat altitudinem, siquidem homogœneus illi sit, vel ut alius humiliusve consistat, si eodem vel levior vel gravior fuerit. Unde colligere vult, quoniam 27 digiti mercuriales æquiponderent altitudini atmosphericæ, follem mercurio repletum dictamque excedentem altitudinem in aere perinde dilatatum iri, atque dilataretur, si stagnanti alicubi mercurio immergeretur ad 27 digitorum profunditatem. Ad instantiam hanc diluendam sciendum, longe aliam esse rationem follis aeri expositi, quam follis in hydrargyrum demersi, prout ex mea explicatione evidentissime liquere potest. Si Follis aeri exponatur, omnia alarum puncta premuntur a filamentis atmosphericis ejusdem ad sensum altitudinis, quorum singula æquiponderant 27 pollicibus mercurii: sin demergatur in hydrargyrum, puncta quo propiora basi follis, eo minori extrinsecus pondere afficiuntur, filamentis mercurialibus sensim decrescensibus versus superficiem stagnantis hydrargyri, ubi tandem plane evanescent; adeoq; follis homogœneo liquore adimpletus necessario eousque sive dilatabitur sive constringetur, donec liquor intra extraque illum in eadem planitie horizontali constiterit, utpote quo casu singulis ejus punctis intra extraque follem ejusdem respectively altitudinis & ponderis filamenta incumbunt. Hæc hæc tenus.








Quantum ad D. Pujolas refutationem, sic ille ad evertendam hanc Machinam ratiocinatur: Argentum, inquit, in folle 40 digitos alto non potest delabi ad 27 digitorum altitudinem, quin eousque dilatetur follis, ut in ejus summitate plus relinquatur vacui spatii, quam antea occupatum fuerat a tredecim mercurii digitis, qui descenderunt. Vacuum istud impleri denuo nec per mercurium tubi, nec per materiã subtilem potest; quoniam neutrum horum fluidorum aliis viribus in follem impelli posset, quam iisdem, quibus follis expanderetur: quæ vires non æstimandæ forent ex omnibus 40 digitis inclusi mercurii, utpote quo-

rum 27 ob atmosphæaræ æquilibrium irriti redderentur, sed a reliquis duntaxat tredecim: hæ vires autem non possent adigere in summitatem follis, nisi 13 alios mercurii digitos, qui non sufficerent ad implendum vacuum. Ergo &c. Verum enimvero præterquam quod nulla in hoc ratiocinio evidentiâ est mathematica, multa quoque occurrunt, quæ vix admitti possunt. *Primo* cum dicitur, delapso ad 27 digitos mercurio, vacuitatem nasci majorem spatio a 13 delapsis digitis antea occupato, id perpetuo & absolute verum non est; posset enim nunc major nunc minor esse dicto spatio, pro diversa ratione amplitudinis basis ad altitudinem follis. *Secundo* non necessum esset, ut mercurius per tubum impelleretur in follem iisdem illis viribus, quibus dilatatur follis; numquid impelli posset pondere columnæ atmosphæricæ tubi vasculo incumbentis? Videtur hic Auctor revocare velle circulum Cartesianum; constat autem, phænomena hydrostatica longe melius & felicius explicari per Paschalii columnas, quam per circulum Cartesii. *Tertio* si res foret explicanda per circulum, dicendo, mercurium impelli per tubum in follem a pauculo aere folli circumfuso, qui per follis dilatationem loco pulsus fuit; tum sequitur pariter, in siphone cujus crus longius exæquat 40 digitos, argentum ex breviori pelli in longius, vi pauxilli aeris, qui per effluxum argenti longiori exuadavit; adeoque ascensum mercurii per crus brevius tempore correspondere debere cum descensu ejus per longius, quod experientiæ refragatur; cum lapsus ejus per longius sit momentaneus, ascensus per brevius lentior & successivus. *Quarto*, non tantum 27 digiti mercurii inclusi, sed tota ejus altitudo, etiamsi 100 exæquaret digitos, irrita redderetur a contrapondio atmosphæaræ, ut ex nostra explicatione liquet. *Quinto*, nulla evidens ratio est, cur tredecim mercurii digiti non possint impellere in follem tantum argenti, quantum sufficit ad replendum totum vacuum; tametsi enim amplitudo hujus vacui major sit spatio, quod occupant tredecim delapsi digiti, ejus tamen altitudo 13 digitis necessario minor esse debet. Constat vero, vires liquidorum æstimandas esse ex sola altitudine, nulla habita ratione molis; prout parva liquoris alicujus quantitas angustiori siphonis cruri infusa, ad eandem attollit altitudinem multo majorem ejus molem in ampliori crure contentam. Atque hæc de insufficientia responsionis D. Pujolas.

Idem refutavit objectionem ab Auctore Machinæ sibi motam.

Quoni-





Quoniam vero rationes ejus in Novellis non recensentur, superest, ut & hanc instantiam ex hypothesi mea diluam. Memorat Auctor, experimentum se cepisse cum folle 10 digitorum, cujus basi adaptatus erat tubus 30 digitorum mercurio repletus & superne sigillatus; follem enim sibi relictum expansum fuisse, descendente mercurio tubi ad consuetam altitudinem 27 digitorum. Sed quotasquisque est, qui in nostra explicatione non videat rationem disparitatis inter utrumque follem? In folle 40 digitorum, universa mercurii moles externi aeris pressione mediantibus alis compressibilibus exposita est; in folle vero breviori soli infimi 10 digiti ab aere laterali afficiuntur, totaque mercurii portio inclusa tubo ob firmitudinem laterum ejus a laterali aeris pressione immunis præstatur; unde cum solius tubi longitudo 27 digitos exsuperet, mirum non est, subsidere in illo mercurium. Num vero præcise ad 27 digitorum altitudinem descensus sit, subdubito, calculo diversitatem nonnullam exhibente. Est *Follis ABC*, cui adaptetur tubus *DE*. Ex hydrostaticis principiis notum est, a pauxillo liquore tubi *DE*, licet angustissimi, tantundem premi subjectam basin latissimam *AC*, quantum præeretur a multo majore ejus copia in tubo *AG*, ejusdem quidem altitudinis cum *DE*, sed amplitudinis longe majoris, nempe basi *AC* adæquatæ, contenta. Loco igitur tubi *DE* substituitur alius *AG*, repletus itidem mercurio, qui fingatur descendisse in *h*, ibique æquilibrium constituere cum externo aere *L*, qui alas *AB*, *BC* comprimit. Sunt autem in Folle pyramidalis *ABC*, altitudo $BD = a = 10$ digitis. BA vel etiam $DA = b$. Circumferentia basis $= c$. Altitudo mercurialis 27 digitorum æquivalens altitudini atmosphæricæ $L = d$. Altitudo quæsitæ $DI = x$. Deprehenduntur momenta infinitarum superficierum prismaticarum (circa communem axem *IB* constitutarum & exhaurientium soliditatem follis *ABC*, tubique *AM*) constituaere geminam seriem secundanorum, diminutam serie tertianorum, cujus ultimus terminus $b c x + a b c - a b c$, adeoque summa momentorum $\frac{b b c x}{3} + \frac{a b b c}{3} - \frac{a b b c}{4} = \frac{b b c x}{3} + \frac{a b b c}{12}$. Momenta filamentorum atmosphæricorum *L*, alas *AB*, *BC* comprimentium constituunt seriem secundanorum, cujus ultimus terminus $b c d$, adeoque summa momentorum $\frac{b b c d}{3}$; unde $\frac{b b c d}{3} = \frac{b b c x}{3} + \frac{a b b c}{12}$, & $x = d - \frac{1}{4} a = 27 - 2\frac{1}{2} = 24\frac{1}{2}$ digitis. Patet ergo, altitudinem argenti post descensum fore $34\frac{1}{2}$ digitorum

TAB. VII.
Fig. 1.

gitorum, si follis altitudinem una comprehendas; sin minus, tantum $24\frac{1}{2}$ digitorum; illo nempe respectu majorem, hoc minorem 27 digitis. Non nego tamen, altius in tubo sustentari posse, imo debere, si & ratio habeatur aeris externi, basi follis incumbentis, alarumque divaricationem tanto fortius prohibentis, cujus quidem nos considerationem hic negleximus.

II.

Iubes, ut examini subijciam iteratam Responsonem, quam Auctor Perpetui Mobilis sub finem superioris anni animadversioni Dn. Papini opposuit, cujusque me nuperrime participem fecisti, transmissis Novellarum Batavarum ex mense Decemb. foliis nonnullis. Id nunc, expedito quod nostri negotio, eo lubentius in me suscipio, quod ex discussione Responsonis hujus maximopere illustrari & confirmari videam illam meam hypothesein, quæ defectum machinæ e vectis ratione deduxit.

Duabus Responso memorata partibus absolvitur, in priore Auctor inversione totius Machinæ, in altera partium quarundam immutatione pristino retento situ objectioni satisfacere studuit. Quantum ad inversionem Machinæ, quo jam in prima sua Responsoe digitorum obscure intenderat Auctor, huc ejus conjicio redire mentem. Existimat perinde esse, quantum ad inclusi Mercurii vires, quo situ erigatur Machina; itaque si externi aeris pressione debiliores forte judicentur, invertendam duntaxat esse pyramidem, applicandumque tubum sursum spectanti vertici; inversum namque follem a prævalente aere, non aliter atque in altero situ, compressum iri extruso per tubum mercurio in vasculum; compresso folle præponderaturum ejus verticem, atque ad situm horizontalem se demissurum; postmodum refluxurum esse e vasculo mercurium, follemque de novo dilatatum iri (quandoquidem tubi vasculum 22 tantum digitis a vertice follis distans altius consistat axe motus, qui prope centrum gravitatis machinæ constitutus 30 circiter ab eodem vertice digitis abest;) denique folle sic dilatato erecturum se verticem præponderantis scilicet jam iterum basi, atque ita Machinam recuperato pristino situ alternas rotationis vices perpetuo continuaturam. Sic Auctor. At ego revocato ad examen ratiocinio isto deprehendo, eandem causam, quæ follis dilatationem nuper prohibuit, cum basis sursum spectabat, contraria nunc ratione base

basis deorsum versa ejusdem compressionem impedire; adeo invida natura Protei adinstar contrarias induere solet formas, velut omni studio conatus nostros in tam nobili indagine delusura. Cujus quidem diversitatis rationem nescio an dare poterit Cl. Papinus, qui solam hydrargyri molem spectare solet, cum hæc in utroque follis situ una eademque maneat: In nostra certe hypothese discriminis causa evidens admodum est, quandoquidem in priori follis situ longiora filamenta mercurialia, quæ præcipuum machinæ momentum conferre deberent, inutilia & inertia fere existunt, incumbentia quippe solum ipsi follis vertici, seu vectium hypomochlio, partibusque illi vicinissimis; cum eadem in situ altero premendo partes a vertice remotissimas, insigne valde in divaricandis alis robur acquirant. Hinc enim fit, ut eadem mercurii inclusi quantitas, quæ uno in situ sustinendæ pressioni atmosphericæ neutiquam par fuit, in altero ei multum prævaleat, follique dilatando abunde sufficiat. Ne vero quod dixi de insignibus viribus, quas mercurius in alas inversi follis exerat, scrupulum movere possit apud ignaros hydrostaticæ scientiæ, qui sibi forte persuadent, *alas istas ab intercepto mercurio omnino non affici, utpote cujus filamentis nullatenus subjacent; observandum, perinde se hic rem habere* atque cum situla aqua repleta, qualis repræsentatur Fig. 2. ubi filamenta aquea *ab, ab&c.* nativo gravitatis impetu directe quidem fundum feriunt, sed ab ejus rigiditate repercussa quasi, ad latera situlæ defleunt, eaque in singulis punctis non minore afficiunt pressione, quam qua afficerent, si directe singulis incumbere; quod vel exinde colligitur, quia insertis hinc inde perforato utriusque lateri tubis *cd, cd.* aqua in singulis sursum impellitur ad altitudinem æqualem ei, quam intra cavitatem situlæ obtinet. Ad eundem scilicet modum in Folle perpendiculariter erecto, cujus basis ima respicit, singula alarum puncta *g&c.* (Fig. 3.) intelligenda sunt premi extrorsum a totidem filamentis mercurialibus *mn, mn* &c. inde ad verticem follis protensis: nec alia utrobique differentia est, quam quod basis follis non sit rigida materia instar fundi situlæ, sed corium plicatile; e quo tamen aliud videtur nihil sequi, quam corium istud primo detrudendum esse ab incumbente pondere mercurii, donec expanso per detrusionem, quantum fieri potuit, & rigescente jam corio, conatus prementis hydrargyri in utramque deinceps, uti dictum, follis alam redundet; prout nullum dubium est,

TAB. VII.
Fig. 2.

quin si loco rigidi fundi situla substituaturs flexilis quædam materia, nihilominus aqua in tubis *cd, ed* &c. ad eandem cum inclusa altitudinem assurrectura sit, postquam flexile fundum, quousque potuit, ab illa detrusum & extensum fuerit.

Ut jam consueto nostro calculo determinemus accuratam pressionis quantitatem, qua utraque pyramidalis follis ala tam intus a mercurialibus, quam extus ab aereis urgetur filamentis; notetur, momenta harum pressionum componi ex tribus rationibus, ex ratione videlicet altitudinum filamentorum, latitudinum alarum follis, & distantiarum denique a vertice ejus, ceu hypomochlio: Altitudines filamentorum mercurialium *mn, mn* &c. (Fig. 3.) incipiendo a vertice *n*, constituunt seriem primanorum, cujus ultimus terminus est altitudo *np = 40* digitis = *a*, atmospheriarum autem *gb, gb* &c. altitudines seriem æqualium, quarum singulæ æquivalent 27 digitis mercurii = *b*: Latitudines alarum, ut & Distantiæ ab hypomochlio, conficiunt duas itidem series primanorum, quarum ultimi termini sunt maxima alæ latitudo ad basin, quæ sit *c*, & ejusdem longitudo *on*, vel potius recta *op*, directioni filamentorum *bg, bg* &c. perpendicularis, quæ vocetur *d*. Erit itaque summa momentorum omnium totius mercurii $\frac{ac d d}{4}$, quæ se habet ad summam momentorum atmospheræ $\frac{b c d d}{3}$, ut 34 ad 46, id est, substituto valore ipsarum *a* & *b*, ut 120 ad 108, seu 10 ad 9. Fortior igitur pressio est ab intra profecta a mercurio, pressione ab extra, quam producit aer; quare dilatabitur follis, non constringetur, contra quam existimat ejus Inventor. Quod si follis non pyramidalis, sed triangularis fiat (qualem construi posse non est dubium) tunc pressio ab intra ad pressionem ab extra erit, ut 22 ad 36 hoc est, in folle 40 dig. alto, ut 80 ad 87: adeo ut hac tantillo majore existente, comprimi quidem valeat ejusmodi follis ab ambiente aere; id quod obtinendi motus perpetui spem aliquam facere posset, nisi tum nova a longitudinetubi & collocatione vasculi oboriretur difficultas, quæ ex nunc dicendis plenius eluoebit. Reperi namque eodem duce calculo sequens generale Theorema, observatu valde dignum, utpote quod omnem hac de re quæstionem statim dirimit: *In quovis folle perpendiculariter erecto seu triangulari seu pyramidali, cujuscunque sit altitudinis & quocunque adimpletus liquore, sive basis sursum deorsumve spe-*

Etet, pressio liquoris inclusi tanta est, quanta proficisci potest ab uniformi columna ejusdem liquoris, cujus altitudo sit equalis distantia summitatis a centro gravitatis follis: adeoque si tubus summitati follis applicatus e regione centri gravitatis terminetur, representabit machina siphonem crurum equalium, intercedente utrinque perfecto partium equilibrio.

Hinc constat primo, si basis follis sursum respiciat, in triangulari requiri ter 27, id est, 81; in pyramidali quater 27, hoc est, 108 digitorum altitudinem, ad constituendum æquipondium inter externam atmospharam & inclusum hydrargyrum: quandoquidem tum centrum gravitatis ibi tertiam, hic quarta solum parte altitudinis a summitate distat: sin vero basis deorsum spectet, sufficere in triangulari folle $40\frac{1}{2}$, in pyramidali 36 digitos, quoniam tum centrum gravitatis ibi duabus tertiis, hic tribus quartis partibus altitudinis, utrobique scilicet 27 digitis, a summitate abest; adeoque hoc in situ sufficere illi subduplam, huic subtriplam, ejus quæ in priori situ requirebatur, altitudinem.

Constat etiam secundo, mercurium follis triangularis 40 digitos alti, cujus basis sursum spectat, æquipollere non nisi $13\frac{1}{3}$ digitis pyramidalis vero paris altitudinis, duntaxat 10 digitis, (non 20, ut putat Cl. Papinus;) sin vicissim basis deorsum vergat, illius mercurium æquivalere $26\frac{2}{3}$, hujus 30 digitis.

Constat denique tertio, quod ubicunque statuatur tubi vasculum, Auctor Machinæ necessario spe sua frustrandus sit. Nam in folle, cujus basis sursum conversa est (Fig. 4) si vasculum r, humiliter collocetur axe motus, sive huic vicino centro gravitatis s; præponderabit ex natura siphonis argentum tubi; comprimetur ergo follis, non dilatabitur, ut vellet Auctor: sin altius constituatur, præponderabit equidem argentum in folle, eumque dilatabit; sed rotata postmodum circa axem, & situm horizontalem adepta machina, non poterit argentum e folle in vasculum elevatius retrofluere. Vice versa in folle cujus basis ima respicit (Fig. 5) si vasculum supra axem statuatur, prævalebit hydrargyrum in folle; quare dilatabitur, non constringetur, ut optaret Auctor: sin infra axem, constringetur quidem, sed facta deinceps rotatione nullus jam mercurii loco humili in altiozem, e vasculo in follem dabitur refluxus.

TAB. VII.

Fig. 4.

Fig. 5.

Atque ita confido, me non tantum absolutam impossibilitatem consequendi hac ratione motus alicujus perpetui ex meo principio

Sole clarius ostendisse; sed & Regulam simul universalem exhibuisse, pro æstimandis quibuslibet in Triangulo vel Pyramide compressibili contentorum liquorum pressionibus: id ipsum est, quod Auctor Machinæ in fine Dissertationis suæ a Doctis indagari desiderat, quodque contemplationis insignis & usus fore non exigui recte conjicit. Hæc de prima Responsionis parte.

Quod jam alteram attinet, qua pristino retento situ vel prolongatione follis, vel abbreviatione tubi Machinæ suæ medelam afferre studuit, ei non est cur immoremur; quandoquidem non meum, sed Papinianum calculum enervat; quocirca quid ad correctionem hanc ex suis principiis sibi respondendum sit, ipse viderit Papinus; quod me spectat, prolonget, abbreviet Auctor, quantum volet, quid profecturus sit, unico supra allato dilemmate edoceri poterit. Nolo etiam bina Experimenta de Folle in aquam demerso, alioque adaptatum in basi tubum habente, quorum mentionem iteratam in Responsione sua injicit, hic recoquere, postquam disparem inter hos folles & controversam machinam rationem in prima mea Appendice liquido ostendi. Unicum est quod non possum quin occasione dictæ Appendicis memorem, me videlicet parumper justo æquius in illa de Papini calculo sensisse; conjecturabam enim, illum seposita vectis consideratione, Mercurii pressionem in folle juxta molem æstimasse, adeoque subtriplam ejus, quæ a columna uniformi & æque - alta proficiscitur; video autem, ab ipso statui omnino subduplam; cum tamen ignorare non debuerit, pyramidem subtriplam esse, non subduplam æque - alti Prismatis ejusdem basis.

AUGMENTA QUÆDAM ET EXPERIMENTA NOVA CIRCA ANTLIAM PNEUMATICAM, FACTA A PARTIM IN ANGLIA, PARTIM IN ITALIA, COMMUNICATA A DIONYSIO PAPINO, MED. D. & SOC. REG. ANGL. SOCIO.

Londini, 1687, in 4.

MEMORES promissi, quod in Actis proxime præteriti mensis pag. 84. dedimus, exhibemus nunc appendicem, quam Papinus tractatui a nobis nuper recensito subjunxit; aut si mavis, alteram eamque potiore tractatus partem. Iste enim cum tribus constet sectionibus, harum non nisi una Novo Ossium Digestori, de quo tamen rubrica potissi-

potissimum concepta est, dicitur; reliquas duas absumit antlia pneumatica, de qua nunc agendum nobis erit. Communicaverat Autor clarissimo jam ante 12 annos hujus usum in libello Parisiis edito, cui titulus: *Nouvelles experiences du Vuide*, seu Nova Experimenta circa Vacuum; at cum opuscula ejusmodi facile deperdi, rariusque de novo imprimi soleant, maluit totius machinæ constructionem in tractatu hoc denuo repetere, quam simpliciter Lectorem istuc ablegare. Eandem proinde & nos in eorum gratiam, quibus aut Gallica ista, aut Anglica hæc legere non vacat, huc transferre non gravabimur; non solum quod Autor hanc suam machinam omnibus aliorum hac in parte inventis perfectiorem autumat; sed & quia diversis eam accessionibus novis adauctam nunc exhibet.

Depingitur tota ejus fabrica in Fig. 6. ubi AAA est ped TAB. VII.
 gma tribus cruribus insistens, ac duos cum dimidio pedes altum. BB Fig. 6.
 ipsum antliæ corpus exacte lævigatum & æquabile ab una extremitate ad alteram, pegmati modo dicto firmiter affixum ope trium cochlearum, quæ transeunt per tres lamellas æneas, antliæ ferruminis ope adfixas. CC est operculum antliæ obliquo situ impositum. D foramen in summitate hujus operculi, valvula munitum, quæ aeri egressum quidem ex antlia concedit liberum, ingressum vero inhibet. EE vasculum non admodum profundum ferruminatum supra operculum CC: inserviens ad aquam jugiter super valvula D servandam. F exiguum foramen obturatum stylo æneo & vesicæ segmento, per quod aer rursus intra recipiens admitti potest. G G discus antliæ supra quem aptatur recipiens VV. HH est canalis ferruminatus una sui extremitate ad foramen in centro disci G G; altera ad medium operculi CC, ut nempe communicatio pateat inter receptaculum VV & antliam BB. I signat valvulam applicatam fundo canalisi HH, quæ viam præbet aeri ex recipiente VV intra antliam BB, at reditum ejus per eandem viam prohibet. LL est tubulus ferrumine junctus antliæ circa superiorem ejus partem, & corio fortiter circumligato occlusus. MM stylus æneus pertransiens corium, quod tubulum LL obturat, ac pertingens ad valvulam I, quo quis movendo exteriorem hujus styli partem aperire aut claudere pro re nata queat valvulam, sine admissione aeris externi per tubum LL, utpote qui corio exacte occluditur. N pondusculum est, cujus æquilibrium clausam servare queat valvulam I. OO

virga ferrea affixa embolo antliæ, habens in ima parte stapedem, cui quis pedem immittens sursum ac deorsum movere valeat embolum: virga hæc ferrea transit per foramen in centro orbis Q , quod facit ut in situ directo ad axem antliæ illa moveri valeat. RR SS est embolus hujus machinæ, tantum ab aliis pistillis diversus, ut singulæ ejus partes explanatione indigeant. Scilicet constat duabus partibus principalibus, RR ac SS , pars superior longior est ideo, quia totum atmospheræ pondus quasi sustinet, excavata quoque interius, ut aquam contineat: pars altera SS brevior est, dum inservit saltem sustentandæ aquæ in parte RR contentæ, ne deorsum labatur. TT canaliculus utrinque apertus, transmissus per partem SS cui adferruminatur, ac pertingens prope ad operculum usque partis RR . XX est alius tubulus transiens centrum partis SS , cui ferrumine jungitur, perinde ut & operculo partis RR ; atque hic canaliculus foramen γ habet non longe a dicto operculo. Quando jam descriptus ita embolus est prope fundum antliæ, tenuior extremitas tubi recurvi, representati *fig. 7.* inseri debet officio canaliculi TT , ut aqua dein immissa infundibulo, quod est in summo tubi hujus recurvi, penetret per superius ostium canalis TT in summam partem emboli, dum aer mediante foramine γ libere emigrat per imum officium tubuli XX ; hinc aqua ulterius replet spacium ZZ , quod intercedit inter utramque emboli partem; nec decidere aqua hæc potest, dum impeditur a parte SS : pars ergo RR aquæ istius ope omnino circummunita est, nec aer inter embolum antliamque semet insinuare valet intra vacuum, quod superius efficitur. Usus deinde machinæ sic instructæ ita se habet, ut aqua infundatur antliæ per canalem HH , eo sine, quo dum impellitur embolus versus antliæ verticem, aqua hæc omne illud spacium impleat, ad quod embolus ipse pertingere nequit, utque hoc pacto omnis aer ex antlia ejici valeat per foramen, quod est sub valvula D : hinc recipiens exhauriendum applicatur super discum GG , & pondusculum N tollitur ad aperiendam valvulam I , eodem tempore dum pistillum pede deorsum trahitur; ita contingit, ut aer ex recipiente VV libere desluat in antliam BB per tubum HH , ut alio dein non opus sit, quam ut valvula I rursus occludatur, ad regressum denegandum aeri, (qui pistillo iterum intruso sursum per foramen D erumpere cogitur,) & operatio hoc modo toties repetatur, donec recipiens plane fuerit evacuatum. Tameñ vero

Autor

TAB. VII.
Fig. 7.

Autor difficillimum automet, secundum methodum ab aliis adhibitam perfectum efficere vacuum, dum aer in vase maximam partem exhausto summe dilatatus vix habilis est ad valvulam antliæ amplius aperientiam (id quod in specie de clarissimi etiam *Sturmi* antlia annotat,) ut sic plerumque aliquantilla ejus portio maneat residua: nihilo minus in hac sua machina id minime metuendum putat, dum aëria transitus ex recipiente in antliam sit liberrimus, tam ob ejus elasticitatem, quam pondus; præsertim cum canalis *HH* jam sat amplus sit, nec adeo ejus exilitas (quam in data olim descriptione nimiam fere fuisse agnoscit) aëri transeunti ulla tenus obesse valeat. Præterea & hac ex parte commodiorem nunc hanc suam machinam a se redditam esse prædicat, quod discus *GG* adeo accurate complanatus & lævigatus sit, ut recipiens applicatum sibi tam exacte claudat, ne ullo ulterius cæmento opus sit, quod antehac circumlitum non digitos operantis minus, quam vitra unctiosa reddebat. Novam quoque rationem commentus est res receptaculo evacuato inclusas facili negotio & absque ulla aëris admissione movendi, & quidem plures etiam simul, si opus sit. Nimirum sumit receptaculum utrinque apertum, quale in *Fig. 8.* est *AA*, cujus minori aperturæ (major enim antliæ disco incumbit) applicat laminam metallinam *BB* pluribus pertusam foraminibus, huic dein obtendit corium madefactum, & per hoc laminæque foramina tot intrudit stylos æneos, uti hic *CC*, quot requiruntur ad res intus movendas: stylus enim, quem corium arcte ambiens excluso aëre sic tenet, ut pars exterius, pars intra receptaculum extet, digitis pro lubitu regi, & regere vicissim ac movere res inclusas potest: pro majori vero securitate suadet, ut supra recipiens adferruminetur circulus *DD*, qui aqua affusa repletus aëris irruptioni fortius adhuc resistere valeat.

TAB. VII.
Fig. 8.

Sternit hocce inventum viam alii cuidam operationi non minus proficua, ut nempe Vitrum exhaustum infra vacuum operculo claudi queat, absque ulla aëris intromissione, cumque eum ipsum modum omnibus aliis in hac re alias adhiberi solitis Autor præferat, eundem & hoc loco commemorasse haud pigebit, præsertim quod operatio talis, uti ex sequentibus patebit, ad producendos varios effectus necessaria sit. Est itaque in *Fig. 9.* *AA* Vas vitreum, continens materiam
talem, quam in vacuo ocludere juvat. *BB* operculum superficie ex-
actissime

Fig. 9.

actissime complanata correspondens orificio vasis *AA*. *CC* est tenuissima plumbi particula, alligata vasi *AA* ac suffulciens operculum *BB*, ut vasculum *AA* apertum maneat, indeque aer libere emigrare queat. *DD* est vas magnum aqua plenum, cui immittitur vasculum *AA*. *EE* signat aliud vas aperturam deorsum spectantem habens, exacte complanatum & applicatum orificio vasis *DD*. *FFF* est canalis insertus angustæ aperturæ in vertice vasis *EE*, & communicationem habens cum antlia pneumatica, ut hac via aer extrahi possit. *GG* stylus æneus transiens per foramen in tubulo *FF*, cujus ope deprimi operculum *BB* valeat ad orificium vasis *AA*, postquam id aere jam evacuatum est. Hunc vero canalem æque ac stylum æneum tam arcte præligare oportet vesica aut anguillæ cute, ne aeri insimul aditus pateat intra vas *EE*. *HH* est epistomium per quod aqua intromitti queat in vas *DD*, quando lubitum est. *II* amphora seu cupa aquis plena, cui immittendum est vas *DD*. Rebus sic dispositis, antlia pneumatica agitur ad extrahendum aerem per canalem *FFF*: exhaustis ita probe vasis, stylus æneus *GG* deorsum trudendus est, ad applicandum iuste operculum supra vas *AA*: plumbi enim particula *CC* facile flexa cedit, dum hoc modo premitur. Tum epistomium *HH* aperiendum est, ut aqua hæc via irrumpens immediate semet superfundat vasculo *AA* quo sic omnibus sub aqua mersis, ab aeris illapsu nil metuendum superfit. Deinde vasculum *EE* separatur a vase *DD*, ac vitrum *AA* eximitur; cujus operculum antequam omnino siccescat, opus est ut junctura terebinthina aut syrupo circumcirca oblinatur: atq; hoc pacto materia in tali vase occlusa in vacuo adservari potest, quamdiu libuerit: & uno recipiente sic exhausto, aliud immediate in locum ejus substitui & exhauriri pariter potest; ut ita intra horæ spacium complura talismodi vasa aere evacuata reddere ac seponere liceat.

Et hæcenus quidem de ipsa antliæ Papinianæ structura, ejusque augmentis & ampliacionibus de novo adjectis & excogitatis dicta sufficere poterunt. Restat nunc, ut breviter etiam de experimentis, quæ machinæ hujus ope instituta in tractatu hoc enarrantur, agamus. Sunt autem ea duorum generum: alia nempe ab autore ipso in Angliâ facta, quæ sectionem secundam constituunt; alia Venetiis in Academia Sarottiana tentata, quæ in tertia sectione enumerantur. Priora quod concernit, protestatur Autor, se eos solum Antliæ usus hic recensere.

censis voluisse, qui aut cognitionem rerum naturalium aliqua ex parte promovere, aut realem quandam utilitatem præstare queant, omissis iis, qui oculos nude aut curiositatem inanem pascere videri possent. In principio mentionem facit novæ istius bombardæ pneumaticæ, cujus & nos ex Transactionibus Philosophicis Anglicanis meminimus in *Actis anni 1686, pag. 500*: ac tametsi eam adhuc dum magnarum esse virium prædicet, sic ut secundum ipsius computum, ex tubo 17 pedes longo, globus diametrum habens unius pedis (excavatus tamen, ne pondere excedat libras $37\frac{1}{2}$) ad distantiam 256 pedum propelli queat intra unum minutum secundum: nihilominus fatetur effectui tanto haud parum decessurum fore, si manibus vulgi experimenti hujus operatio committi debeat, cujus etiam diversas rationes allegat: præterea non dissimulat, aeris in vacuum irrupentis celeritatem, in comparatione ejus quæ globo ejaculando communicanda est, in invento hoc velut infinitam fuisse suppositam; cum tamen e diverso demonstrari valeat, istam aeris pernicitatem majorem non esse, quam quæ ad summum 1305 pedes emetiatur intra unum minutum secundum: ut adeo, cum globus in tubo tali acquisivit velocitatem transeundi modo 100 pedes in uno minuto secundo, jam actio aeris in globum imminuta sit parte sui decima tertia circiter. Pluribus tamen de hoc invento hic agere noluit, eo quod, uti refert, Societas Regia jam in eo occupata sit, ut variis experimentis ejus vires exactius determinet; præmonita saltem hæc in antecessum voluit Autor, ne majores sibi quis ab isto effectus polliceatur, quam quidem præstare valeat. Hinc ad percensenda varii generis experimenta a se facta progreditur, quorum magna pars versatur circa præcavendam variorum fructuum & eduliorum corruptionem, per eorundem inclusionem in exhausto recipiente. Ubi quidem in genere comperit, res talismodi nequaquam per solam aeris externi exclusionem præservari posse, dum ipsarum pleræque fermentationis ope novum ex se aerem producant; id quod ad oculum ipsi patuit mediante baroscopio mercuriali, una in recipientibus exhaustis incluso; cujus Mercurius nempe, etsi post primam aeris extractionem omnino subsideret, nihilominus paucis post diebus plus minusve in tubulo semet elevans, indubia aeris de novo geniti indicia dedit. Attamen rationem adinvenit medendi huic malo, per praviam rerum inclusarum leviculam coctionem, dum recipiens

exhaustum & oclusum aquæ fervidæ immittitur: hac operatione enim vidit, non solum gelatinas, carnes, pisces, sed & varii generis fructus adservari posse multo satis tempore, absque ullo etiam saccharo, utpote cujus admixtionem tali fructuum præservationi obesse potius, quam prodesse testatur. Quinimo perhibet, fructus etiam jam fermentare incipientes nihilominus aliquandiu ab ulteriore corruptione conservari posse, si dicto modo igni admoveantur immediate, postquam in vacuo clausi sunt. Cum tamen non omnis generis fructus coctionem absque sui destructione quadam subire queant, (uti v. g. fraga absque summa alteratione coqui non posse, expertus est,) hinc pendere jubet, quinam præservandi modus cuilibet speciei magis conveniat; quemadmodum ipse deprehendit, cerasa & poma in vacuo non æque feliciter ac in gelatina ad futuros usus recondi posse: de quo adservandi modo *mensæ præcedente* quædam differuimus. Ulterius perhibet Autor, tincturam ex polenta aliisve hujusmodi materiis facile & calore sat exiguo extrahi posse, si aer omnis prius exhauriatur e vase: hoc enim sic ex omnibus corporum talismodi poris elicito, liquoris expeditius intra eosdem penetrare. Ex qua ipsa ratione dulciarii etiam artificibus utilem esse machinam hæc tradit, dum syrupus penitus & absque notabili alteratione rerum condiendarum poros subintrare valeat. Cumque præterea observavit, in fusione metallorum estypum ideo sæpius imperfectiorem emergere, quod aer intra typi cavitates hærens impediatur, ne hic exacte metallo repleatur: hinc futuram perfectiorem fore ratus est, si non saltem inter fundendum typus ab omni aere liber esset, sed & id simul curaretur, ut mox dein admissum totum atmosphære pondus metallo liquido incumbens, illud intra minutissimas etiam typi rimas cogeret. Modum proinde commentus est, quo in recipiente exhausto ipsa talis fusio perficeretur. Nimirum in *Fig. 6.* antiæ disco *GG* applicuit recipiens *VV* utrinque apertum, cujus superiorem aperturam axacte clausit operculo foramen in medio sui habente; huic immisit canalem infundibuli *zz* ferrumine probe circummanitum, cujus canalis ostiolum superius paxillo cæmenti obturavit, dum aer omnis ex recipiente *VV* exantliatus esset: postmodo plumbum liquefactum indidit infundibulo *zz*, sic ut hujus fervore eliquatum extemplo cæmentum, quod canalem obturabat, transitum plumbo concederet, idque ab aere post ipsum cum impetu

in reci-

in recipiens irruente propelleretur intra tenuissima etiam lineamenta subjecti typi 33. Ectypum sic apprime exactum ex fusione emerisise Autor prædicat; quo tamen perfectiorem adhuc fieri posse confidit, si præter hoc inventum alia etiam adminicula artificibus hac in re consueta accederent. Concludit tandem, ex his a se adductis experimentis non minus ac ex iis, quæ antehac a Boyleo, Hugenio, Guerikio communicata fuerant, satis patere, quam multifaria utilitas publico ex antiæ pneumaticæ usu accrescere posset: non enim in exigua solum materiæ quantitate operationes tales procedere, sed in magna etiam copia, præsertim cum capacia satis vitra venalia prostant haud adeo magno pretio, quæ usibus ejusmodi inservire & recipientium loco adhiberi queant. Vanum etiam esse, quod quidam autument, experimenta talia vulgi captum transcendere & doctiores sibi manus solum exposcere, inde probat, quod nautæ, pharmacopœi, dulciarii alique sat ingenii quotidie ostendant, in rebus aliis longe difficilioribus in effectum deducendis. Agnoscit tamen id quasi in fatis esse, ut nugaces ejusmodi objectiones publicum plerumque defraudent fructibus, alioqui ex solerti Societatis Regiæ labore capiendis.

In tertia & ultima tractatus sectione, uti jam supra dictum, agitur de experimentis circa antiæ pneumaticæ ab Academia Sarottiana factis. Nimirum cum clarissimus Sarotti, Secretarius Senatus Veneti, in Anglia legatione aliquandiu functus, anno 1681 Venetias repeteret, proposuit sibi posthac non tantum bibliothecam suam ad usus publicos aperire; sed & ad exemplum Societatis Regiæ academiam experimentalem domistabilire, ad indagandas res naturales, & promovendas magis magisque vitæ humanæ commoditates: unde non solum machinas plerasque, quæ in communi hominum ingeniosorum usu nunc versantur, ex Francia perinde ac Anglia sibi procuravit; sed & ex Anglia eum in finem diversos secum abduxit, quos proficuos istarum rerum adjuutores fore confidit, interque eos etiam Papinum nostrum; qui ad eo biennii spacio, quo Venetiis commoratus est, libertatem habuit, singula in Academia ista eo tempore actitata annotandi; de quibus ea saltem hoc loco communicata voluit, quæ materiæ hujus tractatus quodammodo essent affinia; licet ipse sibi longe plura consignarit, quæ ibidem peracta ac tentata fuere: quemadmodum & unum alterumque Discursum a prælaudati hujus academix fundatoris filio, Am-

TAB. VII.
Fig. 10.

brofio Sarotti ad socios subinde habitum verbotenus recenſet, unde non minus ingenioſa hujus dexteritas, quam methodus procedendi in iſta Societate abunde colligi poteſt. Prima hujus tentamina Autor ait verſata fuiſſe circa varios preſſuræ aeris (ibi terrarum tunc nondum ſatis cognita) effectus, qui vulgo ex metu vacui deduci ſolent; e quibus unicum ſaltem enarrat, quod a nemine adhuc obſervatum, indubie tamen oſtendere autumat, motiones illas, quæ vulgo attractioni adſcribuntur, per meram impuſſionem produci. Scilicet in Fig. 10. diſco antliæ pneumaticæ *AA* applicata fuit apertura receptaculi *BB*, quod aliud anguſtius in ſuprema parte oriſcium habuit, cui inſertus tubulus *CC*, cæmento probe obturatus: receptaculum *BB* ultra mediam ſui partem aqua repletum eſt, ac ne hæc efflueret, dum aer ipſi incumbens extraheretur, per foramen diſci *A* immiſſus fuit canalis *DD*, utrinque apertus: hinc ſumma receptaculi *BB* regione probe exhauſta, & recluſo dein ſupremo oſtio tubuli *CC*, aer immediate cum impetu intrans per tubulum ex ima ejus apertura ſic erupit, ut ultra hanc notabili ſatis ſpacio intra aquam bullæ aeræ descenderent, antequam verſus ſummam ejus ſuperficiem ruruſus emergerent: unde concluſum fuit, attractionem hic vel ideo ſtatui non poſſe, quod aer alioqui mox fuſſum rapi debuiffet, quamprimum e tubulo *CC* liberatus foret, nec adeo viam potuiſſet quærere contrariam ab ea, quam vacui tractio ipſi injungeret. Progreſſam inde academiam ait ad indagandum, quænam aeris quantitas metallorum ſubſtantiam & compoſitionem intret; id quod ita probari poſſe exiſtimarunt, ſi intra recipiens exhauſtum ferri limatura aquæ forti injeſta, cognito utriuſque pondere, notaretur in barometro ſimul incluſo, quanta ex horum ebullitione aeris portio de novo in recipiente enaſceretur; ac certe ſupputatione inita apparuit, aerem ſic productum uſque ad $\frac{2}{3}$ ponderis ferri diſſoluti adſcendiſſe: ac licet academicorum nonnulli hic opinati fuerint, aerem ex ferventi potius aqua forti, quam ferri limatura productum fuiſſe; patuit tamen poſtea, ſolam aquam fortem, tametiſi in vacuo ita calefacta eſſet, ut bulliret, nullum omnino aerem ex ſe progeſſiſſe. Plura nihilominus ad majorem rei hujus certitudinem experimenta facta fuere, quæ ſingula hic adducere nimis prolixum foret. Porro diverſis tentaminibus probatum eſt, aerem eſſe medium cujuſ ope ſoni communicentur auribus: itemque ex collisione ſilicis cum chalybe

chalybe ne minimam quidem in vacuo scintillam prolici, utut aliquid creperæ ac debilissimæ lucis adversum fuerit ab eo, qui ad ipsum collisionis locum accuratius attenderit. Fatetur quidem Autor, a Boyleo in *Exper. Physf. Mech.* scintillas etiam in simili experimento visas esse, sed existimat, eum forte tum temporis nondum instrumenta sat exacta ad manus habuisse. Ulterius inquisitum fuit, num pullus in ovo respirationem, quod nonnulli ob laxiores putaminis poros sibi persuaserunt: contrarium tamen patuit, cum ovum incubatum non solum in exhausto recipiente calorem servasset, sed & eo post aperto pullus adhuc vivere deprehenderetur. Varia quoque tentamina facta reperiuntur super aeris proprietate in dissolutione corporum acceleranda, dum curiose annotata est differentia dissolutionis ferri ac aeris, in aqua forti æqualis utrinque quantitatis, jam in vacuo, jam in aere libero, jam in clauso, jam in compresso aere factæ. Præterea tinctoribus etiam proficiam esse antiam hanc, comprobatum est, cum tam lignum rubrum, quam granorum cocci pulvis, multo citius æqualem aquæ quantitatem inficere cerneretur in vacuo, quam in libero aere: quinimo si calefactio aquæ accederet, patuit dimidiam cocci granorum portionem fortio- rem tincturam in vacuo dare, quam duplum ejus extra vacuum: in tincturis tamen medicinalibus hoc modo parandis, eventus non ita expectationi respondit. Denique reliqua experimenta fere concernunt Destillationem in Vacuo, pro qua perficienda Autor machinam com- municat, quæ *Fig. II.* depingitur, utpote quam commodiorem aliquan- to existimat ea, quæ antehac a Boyleo tradita fuit, licet non omnino ab ea diversa sit. Nimirum *AAAA* sunt duo vasa vitrea, unum quidem ad capiendas materias destillandas, alterum ad recipiendos vapores destillatos. *BB* est tubus communicationem faciens inter utrumque vas, quorum officia tam exacte ejus extremitatibus applicanda sunt, ne aer externus subintrare valeat. *CC* canaliculus utrinque patulus ac ferruminatus ad foramen in medio tubi *BB*. *DD* alius tubulus inflexus, cujus una extremitas intrat canalem *CC*, eique colligatur mediante anguillæ cute, ne aeri aditus pateat: altera extremitas applicatur antliæ aeræ, cujus ope dein aere prorsus evacuandum est hoc instrumentum. Separari vero hic tubulus sine aeris intromissione inde rursus potest, ut instrumentum libere absportare liceat, auxilio ejusdem cutis anguillinæ, si hæc alligetur quidem, non tamen ita tensa super utrumque

TAB. VII.

Fig. II.

trumque canalem *DDCC*, quin satis protrahi queat ad faciendam in medio cutis ligaturam inter hunc & illum: quo peracto dein canalis *DD* vinculum tuto solvi, & ipse semoveri pro lubitu potest. Effectus hujus machinæ is fuisse refertur, ut paratis duobus ejusmodi instrumentis æqualibus, altero exhausto & aere evacuato, altero sibi relicto, & utroque in *MB*. calefacto, prius quidem & citius & copiosius in eodem caloris gradu destillare res sibi commissas animadversum fuerit, quam alterum. Imprimis commendatur ad florum destillationem, eo quod eam non citius saltem, sed & absque ullo empyreumate perficere soleat: uti exemplum refertur de elicita sic aqua rosarum, quæ non solum solito suavius olens, sed &, quod insolitum, aliquot post diebus velut coagulata deprehensa fuerit. Id quoque observatum est, vapores in vacuo non tam alte ascendere solere, ac in ordinariis recipientibus aere compresso plenis: cum enim tubus communicatorius *BB* 20 pollices altus & ex vitro factus fuisset, apparuit etiam si calor in *MB*. ad horæ spacium sat impense continuatus fuisset, vapores tamen nequaquam usque ad summitatem tubi pertigisse, sed maximam altitudinem, ad quam pauca & exigua quædam guttulæ ascendissent, fuisse 15 pollicum: unde Auctor non hoc tantum colligit, in destillatione in vacuo curandum esse, ut brevissimam, qua fieri possit, ascensus viam habeant vapores: sed & sperat, accedente ulteriori experientia, rectificationes ope vacui expeditiores reddi posse, si notetur conveniens altitudo instrumentorum & caloris gradus, qui spiritum eorsum propellere valeat, aquosas particulas nequeat. Denique cum Auctor in Prima Sectione perhibuisset, (dum de machina agebat, quam mense elapso *Fig. 5.* exhibuimus) res destillatas in vacuo multo minus liquoris reddere, quam in aere compresso, idque tantum non pugnare e diametro videatur cum his, quæ modo dicta sunt de expeditiori in vacuo destillatione: ad horum conciliationem monet, experimentum quidem, de quo in Sectione I. fuerit dictum, intenso satis igne peractum esse; at vero omnia hæc Venetiis facta tentamina exilem modo ignis gradum habuisse: itaque ibi quidem calorem etiam particulas rerum destillatarum multum intricatas exolvere, hic vero non nisi volatiliores & minus intricatas elicere aptum fuisse. Jam vero ex diversis his intentionibus, priorem quidem multum juvari, at alteram impediri potius per aeris compressionem ostendit: unde concludit, quod destillationes, qua

nes, qua

nes, quæ requirant calorem intensiorem, melius in aere compresso fi-
ant, at res volatiliores & leniorem æstum exposcentes feliciter in vacuo
destillantur. Atque hæc quidem potissima sunt experimenta, quæ
quoad has materias se præsentente Venetiis facta refert Papinus: cæterum
non ambigit, plura adhuc post suum ex Italia abitum instituta fuisse, an-
tequam Academia hæc per novam dehinc Sarotti in Angliam ablega-
tionem dissolveretur.

CHRISTOPHORI CELLARII GEOGRAPHIA
*Novæ, sive hodiernam Terrarum Orbis faciem cla-
rissime illustrans, ad nostrorum temporum historias ac-
commodata.*

Cizæ, apud Joh. Bielkium, 1687 in 12.

Superioris anni mense Septembri p. 431 hujusdem Autoris *Geogra-
phiam Antiquam* memoravimus: nunc *Novæ* accedit, sive descri-
ptio Orbis, ut nostris ille temporibus distributus est. Additur gene-
ralis præfatio, *Antiquæ & Novæ simul accommodata*, qua fatetur Au-
tor clarissimus, non esse unius hominis, *Geographiam universam* scri-
bere, sed perfectum opus a multis simul expectandum esse, quorum
quisque patriam suam, aut regionem, in qua maxime versatus est, de-
scribat, cujusmodi concordiam an unquam sperare liceat, ipse non
sine causa subdubitat. Interea acquiescimus in eorum labore, qui,
quam diligentissime fieri potest, singula perscrutati sunt, in quorum nu-
mero ut censeatur, dignus cum primis est Autor noster, qui id singu-
lari cura & industria egit, ut Orbis hodierni faciem ex probatissimis
monumentis peregrinantium, ex foederibus quoque & pacificationi-
bus publicis, nec non ex ephemeridum novellis, recentibusque histo-
riis verius pleniusque, quantum modus brevitatii permisit, designaret;
præsertim in Germania nostra, cujus eas provincias, in quibus aut
ipse versatus fuit, aut consulere earum peritissimos Viros potuit, copio-
sius accuratiusque delineavit.

REFLEXIONS PHILOSOPHIQUES ET
*Theologiques sur le Nouveau Systeme de la Na-
ture & de la Grace, Livre III. &c. &c.*

Refle-

Reflexionum Philosophicarum & Theologicarum
in Novum Systema de Natura & Gratia Liber Tertius
de Jesu Christo, quatenus causa est
gratiæ.

Coloniæ, 1686, in 12.

PRæmittitur etiam tertio huic libro approbatio Lovaniensium Theologorum, in qua palmam Arnaldo porrigere non dubitant. Ajunt enim, utut magnus Philosophus sit *Malebranchius*, Theologum tamen in iis, quæ de Christo & gratia docuit, non deprehendi; iterumque Augustini illud applicant, *esse ista magna magnorum doctorum deliramenta*. Controversiam vero jam ad finem vergere monent, cum præsertim Arnaldus nihil amplius hac super re novi promittat, eoque deduxerit adversarii Systema, ut neque ad illustrandum, neque ad refutandum quidquam addi posse videatur.

Liber ipse capita habet XX, in quibus *Arnaldus* propositionem *Malebranchii*, quod *Christus Jesus, qua homo, sui causa occasionalis gratiæ*, examinat & impugnat. Prius tamen in brevi præloquio & *cap. I.* ad dissertationem suam *de miraculis veteris Testamenti per angelos factis* (cujus contenta An. 1685. p. 309. exhibuimus) lectorem remittit; per hanc enim omnia fundamenta propositionis illius eversa esse pronuntiat. Hanc vero ita explicat, ut non debeat intelligi de mediatione Christi, inter Deum & homines, quam orthodoxi omnes confitentur, sed ita ut alios sensus comprehendat, eosdem nempe quos de Angelorum ministerio *Malebranchius* exposuerit. Nempe (1) quod neget Christum ut hominem, ullam potentiam realem ad agendum habere; (2) quod Deum non nisi executorem, absque ulla particulari voluntate, faciat eorum quæ Christus ordinaverit; (3) quod Christus sua tantum, non patris voluntate aut inspiratione ordinet & distribuatur gratiam. Quemadmodum autem tria ista a *Malebranchio*, cum de ministerio angelorum in miraculis V. T. ageret, probata esse ex Scripturis *Arnaldus* negavit: ita multo minus de Christo probari posse censet, & ad decem dicta ex *Epistolis Paulinis* & ex *Act. Apost.* a *Malebranchio* allata, paucis respondet, nihilq; ex iis pro *Malebranchii* sententia demonstrari ostendit. *Cap. II.* repetitis denuo tribus illis problematibus,
primum

primum speciatim aggreditur, in quo ille negat, Christum hominem potentiam realem in regenda Ecclesia accepisse, eo prolapsus, ut dicat, *Christi humanam naturam nil nisi imbecillitatem esse, sicut omnes creaturas cum Deo comparatas.* Hoc vero Arnaldus existimat Nestorianismum sapere, & cum virtute unionis personalis minime convenire, quæ ex Scriptura & Patrum testimoniis, repugnante licet ratiocinatione humana, clarissime asserti demonstrat, & ad dubitationes responderi potest: precatum enim esse, non quia egebat, sed ut nobis exemplum daret, & nostras preces sanctificaret. Monet tamen, etsi ex hoc principio non responderetur Malebranchio, sed concederetur, Christum, quæ hominem, per se nihil operari, sed solum a Patre petere & desiderare; nondum tamen sequi, esse eum saltem causam occasionalem. Nam (*cap. III.*) falsum esse monstrat alterum propositionis fundamentum, quod anima Christi, sive *Christus ut homo* operetur & ordinet, & Deus saltem exequatur. Explicata enim prius Malebranchii sententia, adductisque ejus verbis magnificis, ut ait, & quæ tyronibus admiranda videri possent, simplicia & veriora ex sacris literis opponit, ex quibus clarum & manifestum fiat, Christum non suam, sed Patris voluntatem fecisse. Addit Thomæ Aquinatis sententiam, quod *omnia quæ circa humanitatem Christi acta sunt, divina gesta sint dispositione.* Ex contraria vero Malebranchii opinione sequi indicat (*cap. IV.*) electos non eligi a Deo, sed a Christo, cum tamen prius expresse affirmet Scriptura. Et (*cap. V.*) stante Malebranchii sententia, in quæstione de electione & reprobatione non recurrendum fore, ut Scriptura docet, ad impenetrabilia judicia Dei, sed ad animam Christi, quæ quosdam (ut Malebranchius loquitur) *ut indignos cura sua negligat;* cum tamen Christus ipse omnia Patri attribuat. Allegat maxime & ex Augustino explicat dictum Joh. VI, 44: *nemo potest venire ad me, nisi Pater, qui misit me, traxerit eum:* quod repetitur, & causa incredulitatis inde deducitur v. 64. 65. Addit de induratione textum Joh. XII, 37, & breviter refert, quæ in libro contra *Malletum* scripserit; unde concludit, infringi systema adversarii, sive induratio puniendi, sive corrigendi & convertendi causa, sive ad utrumque finem fieri statuatur; & ad Dei voluntatem determinatam recurrendum esse, non vero ad occasionalem causam in Christo. Assert & Augustini sententiam ex Lib. de

Don. persep. c. 9. it. lib VI. in Jul. c. 14. ubi de parvulis, e. g. duobus originali peccato obstrictis, quorum alter assumatur, alter relinquatur, ad inscrutabilia judicia Dei, non vero (ut Malebranchius) ad animam Christi respiciendum esse docet. Tertium propositionis membrum (cap. VI.) repetitis ex dissertatione de ministerio Angelorum verbis tractat, & ex unione hypostatica naturarum in Christo, refutat Malebranchii tradita, dicentis, quod preces non inspirentur Christo a Deo patre. Ostendit etiam, ut de libertate, & de eo quod in potestate nostra est, obscure & ambigue loquatur; ipse vero cum omnibus sanctis (ut scribit) gratia defensoribus, contra Pelagianos statuit, in nostra potestate esse, & liberrime a nobis fieri, quæ volumus fieri, vel non fieri, quæ volumus, etsi ea invincibili gratia sua Deus nobis inspiraverit; idque vel maxime de Christo verum esse, adeoque minime metuendum cum Malebranchio, quasi ex necessitate agat, si Patris inspiratione agat. Ambiguitatem & dissimulationem etiam adversario imputat, quando alicubi is ita loquatur, quasi quædam ex paterna determinatione, quædam ex sua faceret Christus; vere enim sentire, nullam ejus actionem a Patre determinari. Adscribit quædam de unione personali, ejusque effectu & applicatione, ex Episcopi Meldensis discursu de historia universi. & ex Thomassini libro de Verbo incarnato, & inde iterum concludit, dissuere eos cum Nestorio fœdus unitatis personalis, qui docent, animam Christi agere aliquid independentem a Verbo. Explicat hoc ulterius (cap. VII.) ubi ex Thoma de duabus voluntatibus in Christo contra hæresin Monothelitarum agit, & orthodoxam doctrinam in hoc versari docet, quod naturæ quidem humanæ in J. C. voluntas propria tribui debeat, quæ non (ut Monothelitæ sentiebant) a divina absorpta sit, sive ut instrumentum inanimatum & mere passivæ se habeat; nihilominus tamen credendum sit, hanc voluntatem Christi hominis semper secundum nutum voluntatis divinæ moveri, idque ex Patribus & Theologis antiquioribus adstruit. Occurrit etiam objectioni, quæ ex precibus Christi in horto fieri posset, ubi is videbatur aliud velle quam Pater: adducit autem Thomæ dicta, quibus voluntas illa Christi voluntas sensualitatis dicitur, quæ tamen rationali sese submittebat, & quod illa ipsa sensualitas, sive quod natura humana propriis motibus movebatur, ex beneplacito sit divino; ut Damascenus locutus est. Ex iisdem principiis (cap. VIII.) adversus Malebranchii explicationem I. Tr. de N. &

G. n. 14. disputat, eumque confundere ait *indifferentiam & libertatem*; item male distinguere, quod Christus in omnibus liber sit, exceptis iis quæ ad gloriam Patris spectant. Addit non pauca de perfectione amoris in Deum, quem Christus habet, & imperfectione ejus, quem habent fideles in vita præfenti, aliaque lectu utilia. *Cap. IX.* ad demonstrationem Geometricam, ut scribit, progressus XVIII propositiones sive lemmata ponit, quorum quatuordecim ex *Malebranchii* traditis excerpit, reliqua ex Theologia formavit, inter quæ n. 14. repetitur illud *Damasceni*, supra relatum: *voluntatis divine beneplacito natura humana propriis motibus movebatur in Christo*; & n. 16. additur, maxime hoc pertinere ad voluntatem Christi humanam; quæ etsi liberior & perfectior sit, quam omnium hominum, habeat tamen (secundum verba Thomæ Aquin.) *determinatum modum volendi, ex eo quod est in hypostasi divina, ut scilicet moveretur semper secundum nutum voluntatis divine.* Funditus itaque destrui censet propositionem *Malebranchianam*, quia (1) impossibile sit, stantibus illis lemmatibus, ut anima Christi, unita Verbo personaliter, & ab hoc semper mota, velle possit alia, quam quæ divina voluntas determinaverit; unde & impossibile sit, esse causam occasionalem gratiæ. *Quæ enim causa ipsa est intelligens, & ab alia determinatur, sicut anima Christi determinatur a Deo, illa non potest determinare aliam.* Hoc N. X ex ipsius *Malebranchii* principiis asseritur; qui ideo Christo potestatem a Deo independentem assignasse dicitur, ut occasionaliter, id est independentem & liberrimam Dei voluntatem generalem determinet. Contrarium (2) adstruit Arnaldus ex eo, quod Christus nil velit, nisi quod sciat Deum velle in genere & in specie, & (3) quod Deus legem talem, quam *Malebranchius* supponit, sibi nunquam præscripserit, ut Christo obedire vellet in regenda Ecclesia; sed e contrario, quod Christus legem sibi ad perfectissimam obedientiam Patri præstandam constituerit, voluntatemque suam humanam vi unionis hypostaticæ Deo totaliter submiserit. Corollarium hinc elicit, idque demonstratum esse censet, & ab Ecclesia Catholica semper creditum, Deum in ordine gratiæ voluntate particulari agere, & proinde falsum esse, quod *Christi anima sit causa occasionalis gratiæ.* Demonstrationi isti a priori subnectit *cap. X.* aliam a posteriori, & ostendit, si Christus secundum *Malebranchium* statuatur causa occasionalis gratiæ, tunc omnes illas difficultates in Christum recidere, quæ Deo circa distributionem gratiæ obijciuntur, &

harum a Deo amolendarum causa, ignominiose tractari Christum, scientiam ei imperfectam attribuendo, in quo tamen *absconditi sunt omnes thesauri sapientie & scientie Dei*. Monet autem, non solum nihil tale Apostolos & sanctos sensisse, qui omnes causam difficultatum istarum in imperscrutabilia Dei judicia devolverint; sed & ea, quæ contra sentit *Malebranchius*, sophismatibus & contradictionibus laborare. Examinat inde aliqua ex ejus scriptis, & difficultati illi maximæ nullum remedium ex nova hac sententia afferri dicit, cur nempe Christus gratiam peccatoribus aliquibus conferat, quæ ad convertendos illos non sufficit? item cur permittat tot infantes mori absque baptismo? cur tot nationibus nihil de se prædicari faciat? cur tot malos Christianos gentilium more vivere sinat? Horum omnium culpa Deum liberari ex novo systemate, & Christum onerari, cum statuitur, Deum quidem ex sua parte voluntatem generalem habere erga omnes homines, sed animam J. C. causam occasionalem esse, quæ plurimos hominum ut indignos sua cura negligat. Si hoc (ait) *Malebranchius* non vult Deo tribuere, cur tribuit Christo, quem tamen fatetur immensæ esse bonitatis & misericordiæ? Dein si credit, Deum omnes homines salvos esse velle, impediri tamen sapientia sua, ne particulari agat voluntate, neque conferat omnibus necessariam ad salutem gratiam; cur Christus, qui particulari voluntate agit, non determinat infallibiliter voluntatem Dei, ad salutem omnibus conferendam? Dein si Christus zelum habet pro gloria Patris, & gloria hujus tanto major est, quanto majus, augustius & frequentius est templum Ecclesiæ, quod Christus extruit, cur non omnes omnino homines in illud introducit? Quam misera est responsio (pergit,) quod Christus non pro omnibus intercesserit, quia quosdam cura sua indignos habeat? Improbat iterum thesin *Malebranchii*, quod voluntas Dei generalis de salvandis hominibus impediatur per ejus sapientiam, & quod non nisi simplicissimo modo homines salvare velit; modus autem is sit, ut anima Christi sit causa occasionalis distribuendæ gratiæ. Postea *cap. XI* scribit, ad quæstionem, cur *gratia sive fides salvifica non omnibus conferatur a Christo*, ex veteri Theologorum systemate responderi, quod credant efficaciter & salventur ii, quibus Deus cor aperuit sicut *Lydia*, Act. XVI. 14. & qui *preordinati sunt ad salutem* Act. XIII. 48. & Augustinum docere *cap. 6. de predestinatione, quod Deus voluntates quorundam prepararet, aliorum non prepararet, &*

quod

quod distingui debeant, quæ sunt ex ejus misericordia, & quæ ex justitia sunt; sed ex nova Malebranchii hypothese responderi, causam in Christo esse, cui indifferens sit, an Paulum vel Johannem salvet. Hoc valde paradoxum & incomprehensibile esse ostendit Arnaldus; convenire enim ex præsuppositis Christo, ut utrumque salvet, quia quam maximum facere vult illud ædificium suum spirituale Ecclesiæ. Respondet etiam ad dictum Malebranchii, quod Christus suscipiat eos, qui se primo offerunt & vigilant. Hoc vix absolvi a Semipelagianismo posse existimat, idque Malebranchii probat verbis. Urget porro, quæ causa sit, quod alii primi veniant & vigilantes sint, alii tales non sint: an a gratia, an a libero arbitrio? Si prius, culpam in Christum cadere, qui gratiam non det omnibus; si secundum, Pelagianismum totum aut dimidium non evitari. Addit alia ex ipso Autore, conformia traditis Augustini statuentis: desiderare auxilium gratiæ, initium gratiæ est. item: etiam hoc divini muneris est, ut oremus; quibus destrui monstrat, quæ de venientibus & vigilantibus scripsit Malebranchius. Denique ait, si Christus excusatur, quod solum venientibus, non vero omnibus gratiam conferat, cur non & Deus excusatur eodem modo, ex sententia scilicet Semipelagianorum? Cap. XII. eadem suo modo applicat ad tradita Adversarii, de gratia non sufficienti, & de ea quam ad indurandum dari putat, horribili, ut arguitur, dogmate. Ex argumentationibus autem, quæ contra voluntatem Dei particularem in novo systemate adinventæ sunt, ad Christum applicatis deducitur, idem sequi; nempe ut nec Christus particulari voluntate agat, quia sapientiæ & bonitati Christi non magis ac Dei patris conveniret, particulari voluntate agere, sed potius a particulari illa distributione sufficientis & salvificæ gratiæ abstinere debere. Ad hoc demonstrandum parallelismos facit decem argumentorum, de Deo & Christo, ex hypothese adversarii, ex quibus concludit absurdum & impium esse, quod Autor Christo culpam imputet, quam Deo non vult tribuere, & quod animæ Christi ignorantiam secretorum cordis humani, nisi a Deo revelentur, assignet, agnoscat tamen revelationem precibus & desiderio Christi illico obtineri; quo ipso, & dum Christus preces negligeret, sapientiæ & bonitati ejus detraheretur. Acrius etiam adversus illam ignorantiam assertionem, quod Christus ut homo actualiter nesciat determinationes futuras voluntatis in homine justo, cui gratiam sed non sufficientem ad vincen-

das tentationes contulit, atque ideo non ut Deus sed ut homo agat, infurget *cap. XIII*, nec mollire contumeliosam hanc sententiam concedit, quod distinguat alicubi, inter *scientiam habitualem* & *cogitationem actualem*, & *cap. XIV* ex *Thoma Aquin.* docet, quid de scientia animæ Christi statuendum sit, & an vel quatenus illa in Verbo cui unita est, omnia cognoscat. Afferit autem, id fieri & *habitualiter* & *actualiter*, quamvis aliter opinetur *Malebranchius*, aut terminos illos alio sensu sumat. Addit, quod stante etiam secundum explicationem adversarii, distinctione *habitus* & *actus*, nihilominus Christus non liberetur ab imputatione profana neglecti actus; qui enim *habitualiter* aliquid scit, *actualiter* idem scire potest, quando & quoties vult; unde sequitur in potestate Christi ut hominis semper esse, ut actualiter statum interiorum cordis humani cognoscat; & si id non faciat, negligentiam culpam non esse vitaturum. *Cap. XV.* monstrat, quomodo dogmata *Malebranchii* a sententia *Thomæ* in septem capitibus discrepent. Inde *cap. XVI.* prolixius deducit & accusat, quam indignum & Evangelio Christi plane contrarium sit, quod *Malebranchius* Christo homini ignorantiam fere perpetuam secretorum cordis tribuat, imo quod dicat Christum velle ea ignorare: similem errorem a *Leporio* quodam, tempore Augustini retractatum fuisse. Addit probationes ex historia Evangelica, in qua Christo manifeste tribuitur scrutamen cordium & notitia cogitationum. *Cap. XVII.* prætextus examinat & destruit, per quos *Malebranchium* in errorem illum incidisse arbitratur, ut Christo scientiam secretorum cordis, nisi a Deo revelatorum, abjudicaverit: ita quidem ut pro hæresi & *Nestorianismo* habeat, si quis dicat Christum ut hominem corda non scrutari, nec futuras determinationes cordis nosse; non minus, quam si quis neget Christum ut hominem esse absque peccato, quia natura humana non magis per se ipsam impeccabilis est, quam scrutatrix cordium, extra personalem unionem cum divina. Quod si maxime revelatione Dei ad illam scientiam opus esset, teneri tamen Christum pro bonitate sua statuit, ut illam a Patre petat, a quo nunquam fert repulsam. Negat sine impietate dici, Christum hoc ideo omittere, ut majus miraculum esset, si ut causa occasionalis quosdam homines salvet, quam si omnium corda nosset, omnibusque remedia ad salutem sufficientia applicaret. *Cap. XVIII* quinque propositiones ex hypothese *Malebranchii* format, ex quibus falsitatem sententiæ ejus postea deducit,

deducit, cum is veluti certum asseverat, & cum exultatione & triumpho quodam se demonstrasse putat, Deum quidem velle, ut omnes homines salventur, & facere omnia in eum finem, quæ possit facere ex præscripto sive lege sua, sed non salvare plures quam per regulas sapientiæ suæ, & per viam simplicem voluntatis generalis salvare possit, quodque hoc modo omnes difficultates, quæ in materia gratiæ adversus generalem Dei voluntatem ex eventu particulari opponi solent, dissipentur. Sed nullitatem hujus asserti ex inversione propositionum *Malebranchii* demonstrat, eumque provocat, ut ad singulas has demonstrationes respondeat, monstratque si possit, quod non demonstrant nec concludant; hoc ut Theologo ex conscientia dicit incumbere, aut ut errorem agnoscat & revocet. *Cap. XIX.* alia quædam loca *Malebranchii* in censuram vocat, in quibus sibi ipsi contradicat, & incongrua de Christo pronuntiet, imo ipsi ut causæ occasionali defectus assignet, quibus tamen carere omnino deberet, ut ipse præsupponit; magnam verò rem præstitisse credat, quod culpam Deo adentam Christo injungat. *Cap. XX.* sive ultimo, continuat contradictionum syllabum, quem ex hypothesebus *Malebranchii* collegit. Hypotheses autem illæ (ut jam sæpius & variis modis dicta, etiam nos in compendio denuo exhibeamus) hæc sunt. (1) Deus vult serio, ut omnes homines salventur. (2) nihil est extra Deum, quod eum in hoc proposito impedire possit. (3) in Deo itaque ipso investigandum est, quid eum impediverit, quo minus ipso facto omnes salvet; nempe sapientia ejus, quæ vetat eum in salute hominum operanda particulari voluntate agere. (4) hoc stante, debuit Deus causam occasionalem constituere, quæ voluntatem ejus de salvandis omnibus hominibus determinaret, & sese obligare, se ad hujus causæ occasionalis determinationem acturum esse. (5) nemo nisi Christus ut homo, Verbo personaliter unitus, causa hæc esse potuit. (6) Christus charitatem immensam etiam ut homo habens desiderat, ut templum suum spirituale quod ædificat, maximum & augustissimum sit. Negat quidem *Arnaldus* has hypotheses, neque concedit quidquam in illis verum esse, quam quod Deus certo sensu omnes homines velit salvos fieri, & quod Christus dici possit causa occasionalis gratiæ, si per hanc intelligatur causa *ministerialis*. Sed stantibus illis hypothesebus plane alias formari debuisse contendit consequentias, nempe etsi in ordine naturæ causæ occasionales defectum habere possint,

nullum

nullum tamen patiantur in ordine gratiæ, quia hic dependet a sapientia æterna; itaque Christi ut causæ occasionalis, utpote perfectissimæ officium fore, ut Deum ad ea determinet, quæ illius intentioni de salvandis omnibus hominibus maxime convenirent. Cum vero id non faciat, demonstrative probatum esse, Deum non voluisse omnes homines salvari eo modo, quem *Malebranchius* statuit, neque Christo imputari, aut causam in eo quæri debuisse, si tantum illos salvet, quos Deus voluntate non solum antecedenti, sed consequenti atque adeo necessaria & absoluta salvari voluit. Colliduntur itaque (ut tandem per epilogi modum infert) & subruuntur, quæ *Malebranchius* docet. (1) esse defectus sive irregularitates in causa occasionali, id est in anima Christi, & tamen causam hanc intelligentem esse & ab æterna sapientia illuminatam. (2) male dici indignum esse Deo, ut agat voluntate particulari in ordine gratiæ, & causæ occasionali male imputari, quod gratiam aliquando det ad indurandum aut ad augendam culpam. (3) male statui, omnes homines salvos fore, si Deus particulari voluntate in negotio salutis ageret; male tribui Christo, quod negligat eos, qui se non invocant, & tamen asseri, quod Christus particulari voluntate agat, quæ tamen salutem omnium hominum non efficiat. (4) falsum esse quod Christus casu & fortuito minus det gratiæ quibusdam, quam ad salutem opus habent, dum non cognoscat secretum cordium; cum tamen hanc ipsam qualitatem necessario habeat Christus etiam ex dogmate *Malebranchii*, qui semper eum ut hominem illuminari fatetur a sapientia æterna. Incidisse in hos errores conjicit *Malebranchium* ex curiositate rimandi judicium Dei, & periturum ex dicto Augustini, quia *infrutabilia scrutari voluit, & investigabilia investigare, nisi credat*; conversaque ad eum oratione hortatur, ut præjudicium illud suum, de causa universali, quæ non debeat agere voluntate particulari, neque in ordine nature neque gratiæ, deponat, imo excretur, quod utique facturum eum ab initio fuisse confidit, si vidisset sequelas falsas & horribiles, quæ ex eo fluunt, duas imprimis, nempe quod *anima Christi licet Verbo personaliter unita, ab hoc tamen non dependeat*, nec alias vires quam causæ occasionalis habeat, easque per desideria propria, in Verbo nec formata nec determinata exercent. (2) quod *eadem anima etsi sapientia æterna illuminata, non cognoscat penetrabilia cordium*, qua tamen cognitione ad distributionem gratiæ debito modo faciendam opus habet.

habet. Quam contraria hæc sint doctrinæ christianæ de Verbo, & de unione ejus cum humana natura, & hujus unionis effectibus, diligenter illum jubet expendere; & systema suum potius deserere ac pro falso agnoscere, quam blasphemis istis opinionibus diutius immorari. Testatur se illum vere amare, sed cum zelo eum ab errore reducendi. Idem alios optare, & ut *Leporii* exemplo errores retractet; promississe enim illum, id facturum se esse, si convincatur. Addit, insolens esse, quod quatuor vicibus editum sit systema tot novis opinionibus plenum, absque omni approbatione Episcoporum & Doctorum. Se vero jam totius operis examen non urgere, sed duarum saltem illarum propositionum; has rogat ut septem vel octo Episcopis vel *Doctoribus Sorbonicis* aut *Congregationis suæ* proponat, & approbationem ab iis impetret; hoc si præstare nequeat aut negligat, & more suo convitiis compenset laborem, quem ad ejus emendationem impenderit, nihil reliquum esse, quam ut Deus rogetur, ut illum a tanta cœcitate & periculosa præsumptione liberet, & per viam humilitatis ad veritatem ducat.

Judicandi de controversia ista munus hic non sumimus: illis vero parum abest quin assentiamur, qui exhaustam esse æstimarunt. Si quid tamen de illa in posterum denuo proditurum est, quod non ad meras pertineat verborum contentiones, id quoque excerptum tanto minus nos pigebit, quanto breviori labore defuncturos nos esse speramus. Fieri enim vix videtur posse, ut sine plurimorum, quæ jam tot libellis scripta sunt, repetitione, continuari possit disputatio. Prolixitatem relationis benevoli lectores excusabunt, quæ ob materiæ naturam, & terminorum quorundam novitatem haut facile potuit evitari.

SAMUELIS PUFENDORFII DE HABITU Religionis Christianæ ad vitam civilem, liber singularis. Accedunt Animadversiones ad aliqua loca e Politicæ Adriani Houviyn 7 Cti Batavi.

Bremæ, apud Ant. Gunth, Schverdfegerum, 1687, in 4.

NON alia quæstio Protestantes inter ac Pontificios majore animi contentione per sesqui seculum & ultra agitata fuit, quam quæ de

Ecclesia, ejusque indole ac veritate est. Nam qui seclæ Romanensi ejusque capiti Romano Pontifici addicti sunt, in id unice incubere, ut si non argumentorum numero ac pondere, dimachorum tamen immani violentia pervincerent, Ecclesiæ Catholiciæ ac vere Christianæ nomen, non nisi suo cœtui competere, reliquis Christianis omnibus hæresis aut apostasiæ convitio notatis. Contra vero in Protestantium Ecclesia non defuere Theologi, qui ex veræ Ecclesiæ notarum defectu solide probarunt, cœtum Romanensium non posse sibi illud nomen arrogare, aut illud tantopere jactare; cum a puritate doctrinæ Apostolicæ defecerint dudum, sacrorum aliquod regnum constituendo, quod statum magis civilem, quam regnum Christi, quod non est de hoc mundo, aut mundano simile, repræsentet. Sed non omnes, dum doctrinæ morumque errores crassissimos Pontificiorum diluerunt ac confutarunt, simul cardinem controversiæ attigere, aut etiam primam ejus originem ita perspicue & solide demonstrarunt, ut ab omnibus qui Scholasticas disputationes aut non legunt, aut non capiunt, intelligi satis potuerint. Hanc ob causam celeberrimus *Puffendorffius, S. Reg. Maj. Svec. a Consiliis Aule & Historiographus*, magno cum judicio arcem hanc regni Pontificii subruere aggressus est. Etenim solidis ante fundamentis religionis veræ præstructis, tam indolem ac naturam religionis Christianæ ex immoto sacrarum literarum principio describit, quam *πρωτον ψευδος* Ecclesiæ ac status Pontificii ecclesiastici solide destruit. Hoc vero illud est: *Christum Salvatorem nostrum, dum viam ad salutem æternam perveniendi mortalibus panderet, pariter introducere voluisse potestatem quampiam sacram, que idonea ac sufficiens sit constituendo cerro statui a vulgaribus civitatibus separato, cui divinitus commissa sint imperandi arbitria, & contra que nulli mortalium vel hiscere liceat; hancque esse Romanam Ecclesiam, cujus Rex aut summus Pontifex solus episcopus Romanus esse debeat: hujus imperiû & dogmata qui amplecti recusat, salute æterna potiri non posse.* Hanc, dico, arcem *Autor amplissimus* libro hoc ita arietavit, ut unde falciri queat, tota clericorum Romanensium cohors non facile adparatum inventura sit idoneum. Primum exposita religionis tum naturalis tum revelatæ natura, Principumque circa istam potestate, ostendit Christum non fecisse novum populum, cum nihil in statu illo humili habuerit territorii, nec Principis personam gesserit; sed ut doctorem summum

Apostolorum ministerio doctrinam suam propagasse, absque ullo imperio ipsi concessio. Nam etsi claves regni coelorum illis crediderit, non tamen inde vim imperii alicujus probari posse. Hinc quid Ecclesia significet, exponit: quæ licet regnum Christi vocetur, non idem statum aliquem aut rem publicam, quæ uno imperio humano contineatur, notet. Hoc solide demonstrato, Ecclesiam, quæ status aliquis est aut respublica, non posse (qua status aliquis est) a Christo esse, ex structura interna Ecclesiæ in sacris literis definita probat; quæ multum a statu differt. Hoc cum de particulari Ecclesia demonstrasset, §. 34. de universali etiam disquirat, ostendens illam quoque ex intentione & instituto Christi nullum constituere statum: nec adparere vinculum aliquod, quod universitatem Christianorum in unum statum colligare idoneum sit, nec utile esse omnes Christianos ita coalescere; neque opus esse monarcha Ecclesiastico aut iudice controversiarum, qualem se fert Episcopus Romanus: controversias sacras in concilio aliquo per doctores congregatos, ut Act. XV. Apostoli fecere, componi posse. Hinc naturam Ecclesiæ sub imperio infidelium & Christianorum Principum exponit. Qua occasione jus Principum circa sacra & religionem evolvit, ac quid de tolerantia diversarum religionum sentiendum sit, tradit; Principibus inculcans, ne fidem hominibus obnoxii adhibeant, quales sunt sacrificuli, qui obtentu religionis opes quærunt & potentiam, Principumque jura valde imminuunt. Tandem & de jure reformandi agit, docens, civibus etiam competere, a reliquorum communionem, qui erroribus fidei fundamentalibus pertinaciter inhaerent, sese separare, non obstante summorum imperantium, aut cleri sententia: quia quisque pro se cultum suum Deo adprobare teneatur, curamque animæ suæ alteri absolute resignare nequeat.

Appendicis loco propter argumenti cognationem annectit animadversiones ad aliqua loca e Politica contracta *Adriani Houtuyn Juri Belgæ*, quibus probat, autorem hunc in alterum extremum impingere. Nam ut Romanenses conscientias civium dominatui Pontificis R. ita *Houtuyn* Principum libidini subjicit; profanum ac impium *Hobbesii* dogma amplectens, quasi Princeps religionem publicam facere queat quamlibet: quia ut ille censet, publicum omne a potestate publica & externum sit. Quam noxiam viri sententiam jugulat, atque idoneis argumentis conficit.

AUGUSTI PFEIFFERI D. THEOLOGIE

*sive potius μαθηματικῆς Judaicæ atque Mo-
hammedicæ seu Turcico-Persicæ principia sub-
lecta & fructus pestilentes.*

Lipsiæ, sumptibus Joh. Frid. Gleditsch, 1687, in 8.

Nulli dubitamus, septem illarum, quibus eruditissimum hoc opuscu-
lum constat, *exercitationum* argumenta nota jam fore Eruditis. Vi-
ginti enim circiter anni elapsi sunt, ex quo tum separatim, tum junctim
in alma Leucorea lucem publicam primitus aspexerunt. Sufficiet ergo
indicasse titulos, qui singulis præfiguntur. Agit prima *de Talmude*
Judaorum, altera *de Targumim seu paraphrasibus Chaldaicis V. T.* ter-
tia *de Masora*, quarta *de tribaresio Judaorum seu de Phariseis, Sadducæis*
& Essæis. Quinta exercitatione spectandus sistitur *obirectator Apella,*
seu calumniarum Judaicarum in Christum Salvatorem & Christianos
e scriptis præcipue Talmudicis petita recensio. Sexta inscribitur *de Al-*
corano Mohammedi impostoris, ultima denique *de Aliisibiis & Sunni-*
is, sive de præcipuis Persarum & Turcarum circa religionem dissidiis.
Recusæ vero in urbe hac nostra, non sine augmento prodierunt; quod
majus futurum fuisset, nisi ea quæ addere poterat, maxime reverendus
& in Judæorum pariter ac Muhammedanorû scriptis versatissimus Au-
ctor reservanda potius duxisset plenæ editioni *Alkorani*, quam una
cum notis necessariis & antidoto, publico parare se profiteretur in de-
dicatione; in qua etiam harmoniam Muhammedico-Judaicam, quoad
viginti dogmatum ac morum capita, operose monstravit.

ECLIPSIS SOLIS OBSERVATA LIPSIAE,

die 1. Maji st. vet. Anno 1687.

Quanquam calculus Rudolfinus immunem a defectu Solem nobis
Lipsiæ promitteret: quod tamen idem ad angulum orbitæ Luna-
ris & Horizontis, contra quam Tabulæ Rudolfinæ præcipiunt, redu-
ctus, in Ephemeridibus Kirchii nostri, Eclipsin unius digiti exhiberet,
observationem ejus non negligendam putavimus. Cælo autem circa
synodi tempus undiquaque nubilo, & Cauro flante vix aliquid spei su-
pererat,

pererat, phaenomeni hujus deprehendendi; cum paulo ante sonitum horæ 2 pomeridianæ, per ruptas nubeculas Solem, sed vix ad nutum oculi, a Luna adhuc dum illibatum licuit conspiciere: ex quo spem concepimus, Eclipseos hujus aliquatenus saltem observandæ; nec voto defuit eventus. Post horam enim 2 disjectis iterum nubibus Sol comparuit, jam cum sensibili Eclipse, cujus tamen quantitatem, ob conspectus brevitatem annotare nequivimus. Cætera, quæ observavimus, sequens exhibet Tabella.

Horol. urbis			Horol. ambul.			Altit. Solis.		Temp. ex alt. Solis corr.			
H.	/		H.	/	//	Gr.	/	H.	l.	//	
						46.	45	2.	20.	10.	Eclipse jam satis notabilis
								2.	47.	30	$1\frac{1}{2}$ Dig. ad minimum; subtercurrentes enim nubeculae, exactissimam determinationem impedivere.
			3.	1.	0			2.	56.	30	1 Dig. Defectus exiguo. Def. adhuc, sed difficulter perceptibilis.
			3.	19.	0						
			3.	20	30						
3.	15	3.	21.	0				3.	15.	0	Finis: post quem sudum cœlum, ut altitudines Solis notari plurimæ, & cum observatis tempore Eclipseos conferri, temporaque ex iis corrigi potuerint.

*C. CORNELII TACITI OPERA QUÆ
 exstant, ex recensione & cum animadversionibus
 Theodori Ryckii.*

Lugduni Batavorum, apud Jac. Hackium, 1687, in 12.

Cornelii Taciti nec sublimius quicquam iudicio aut rectius, nec eloquentia gravius, nec ubertate fertilius, tota gentiliū habet eruditio: adeo non historiæ tantum dignitatem perfecisse, sed mensuram omnis ferme sapientiæ, qua hominibus licet, explevisse censetur. Merito igitur tanti a M. Aur. Tacito Imp. habitus est, ut ejus effigiem omnibus bibliothecis poni edicto mandaverit, librosque tanta cura adseruari, ut singulis annis decuriones civitatum ejus historiā describi curare jussi sint, inque publicis archivis servare, ne aliquo unquam tempore periret. Sed eadem vetustas quæ cunctas imagines istas delevit, maximam etiam librorum partem absumsit, & ruinis imperii Romani hæc monumenta simul involuta sunt, postquam tot tamque diuturnis bellis, quibus totus occidens concussus est, Franci, Allemanni, Gothi, Longobardi cuncta popularentur: Christianorum autem ab auctore hoc animus averfus cladem & interitum eidem acceleraret. Partem tamen Cornelianæ hujus historiæ haud exiguam Corbejense monasterium ad Visurgim asservavit: unde acceptos & Florentiam perlatos superstitēs libros Leo X edi jussit. Quo studio accensus postea *Beatus Rhenanus*, ex Budensi Matthiæ Corvini Regis bibliotheca optimæ notæ codicem nactus, operam eidem auctori impendit, & post *Franc. Puteolanum* ac *Ph. Beroaldum* emendatiorem auctioremque Tacitum edidit: quem dein secuti *Andreas Alciatus*, *Vicent. Lupanus*, *Marcellus Donatus*, *Æmilius Ferretus*, *M. Vertranius Maurus*, *M. Ant. Muretus*, *Josias Mercerus*, *Curtius Pichena*, ac in primis *Justus Lipsius* & post eum *Val. Acidalius*, *Janus Gruterus*, *Chr. Colerus*, *Scipio Amiratus*, *Virgilius Malvezzus*, *Hannibal Scottus*, *Philippus Cavrianus*, *Christophorus Forstnerus*, *Henricus Savilius*, *Hugo Grotius*, *M. Zuerius Boxhornius*, *Matthias Berneggerus*, *Joannes Freinsbemiſius*, *I. F. Gronovius* alique, insigni studio auctoriū hunc emendarunt ac illustrarunt. In quo labore prorsus eximio nonnulli hanc rationē tenuere, ut quæ ad historiā pertinent, accurate persequerentur; alii verborum, quibus hic auctor lectissimis & ad id quod vult exprimendam accommodatissimis usus est, structuram vel investigarunt, vel injuria ævi turbatam reconcinnarunt; pleriq; deniq; icollegerunt & excerpserunt præcepta ad prudentiam civilem pertinentia, quorum incredibilem vim quandam his Annalibus & Historiis contineri tot evulgati libri consentunt, Corneliano e fundo depromti.

Post tot insignes editiones, hætenus extantes, quarum maximam partem uni volumini Francofurti 1607 evulgato inclusit *Janus Gruterus*;

terus; quem anno sequenti Parisienses typi secuti grandiori & auctiori opere Commentatores Taciti recuderunt; novam plane eamque nitidam & politam, hoc quem agimus anno, in Lugdunensi academia, quam amoenioribus studiis ac eleganti solidaque doctrina exornat, prodidit *Theodorus Ryckius*. Quippe codicem calamo exaratum, paucis antea inspectum, qui Rodolphi Agricola olim fuerat, cum possideret; & ex eo aequae ac Florentino, (quem Pichena olim contulerat, nuper autem haur paulo accuratiori studio Jac. Gronovius V. CL. in Medicea bibliotheca perlustraverat) nec non Galliarum Regis e bibliotheca deprompto codice sibi transmissio, multa loca hactenus depravata restitui posse animadverteret; eo studium contulit, ut quantum fieri posset, vera ac genuina Taciti scriptura restitueretur. Quocirca vix quicquam ex ingenio, etsi eximium id ac profusum capitale habeat doctissimus editor, sed e manuscriptis libris omnia attulit. Ac lectionis hujus, sive a se primum constituta, sive ab aliis antea prodita, rationem in doctis *Animadversionibus* reddidit; in quibus multa ad historiam Romanam, familias, & antiquitates pertinentia, nonnulla etiam ad structuram & conformationem orationis eloquentiamque facientia reperiet studiosus Lector, qui a varietate & jucunditate eruditionis in istis Notis recondita, insignem sibi fructum promittere poterit.

LIBRI NOVI.

Miscellaneorum Historicorum Regni Bohemiae Decas II. Liber I. Authore Bohuslao Balbino Soc. Jesu. Vetro-Pragae 1687. fol.

Sebastiani Christiani a Zeidlern Somatologia Anthropologica, seu Corporis Humani Fabrica. Pragae 1686. fol.

Biblia, & Historico-Harmonica, & Dogmatico-Parallela; seu Universae S. Scripturae tam Veteris quam Novi Testamenti Series & Ordo, Consensus & Concordia. Opus magno labore & multis vigiliis in gratiam S. Scripturam affirmantium, eam docentium dissentientiumque, singulari, plane nova facillique methodo, Germanico sermone congestum, a *Dornkrellis* ab Eberhertz. Luneburgi 1687. fol.

D. Sebastiani Schmidt Commentarius in Librum priorem Samuelis. Argentorati 1687. in 4.

Ejusdem in Prophetam Hoseam Commentarius. Francofurti 1687. in 4.

Ejusdem in priorem Johannis Epistolam Commentarius. Luneburgi 1687. 4.

Cl. Rutilii Itinerarium integris variorum notis illustratum, ex museo Th. I. ab Almelooven. Amstelod. 1687. in 12.

Luciani Samosatensis Opera ex versione Joh. Benedicti, cum notis integris variorum. Amstelod. 1687, in 8.

Aur. Corn. Celsi de Medicina libri VIII, brevioribus Rob. Constantini, IC. Casauboni, aliorumque scholiis ac locis parallelis illustrati, cura Th. I. ab Ameloveen. Amstelod. 1687. in 12.

Martyrologium Ecclesiæ Germanicæ per vetustum, e membranis descriptum, & libro commentario illustratum a M. F. Beckio. Augustæ Vind. 1687. in 4.

Samuelis Stryckii Tractatus de Successione ab intestato. Francof. ad Viadrum 1687. in 4.

Laurentii Donckers Idea Febris Petechialis. Lugd. Bat. 1687. in 8.

Joh. Jac. Harderi Apiarium, Observationibus Medicis centum, ac Physicis experimentis refertum. Basîl. 1687. in 4.

Joh. Frid. Böckelmanni Exercitationes de Actionibus. Lugd. Bat. 1687. in 4.

Vita Johannis Reuchlini, descripta a Joh. Henr. Majo. Durlaci 1687. in 8.

De necessaria secessione ab Ecclesia Romana Disputationes, auctore Francisco Turrerino. Genevæ 1687. in 4.

Joh. Henr. Heideggeri Diatribæ in D. Johannis Theologi Apocalypseo Prophetiam de Babylone Magna. Lugd. Bat. 1687.

Judicia Eruditorum de Symbolo Athanasiano, studiose collecta & inter se collata a V. Wilhelmo Ernesto Tenzelio. Francof. & Lipsiæ 1687. in 12.

M. Joh. Reiskii Commentatio de Glossopetris Luneburgensibus. Noriberge 1687. in 8.

Davidis Clerici Orationes, Computus Ecclesiasticus, & Poemata. Accedunt Stephani Clerici Dissertationes Philologicæ. Amstelod. 1687. in 8.

Introductio in Notitiam Societatum Literariarum, auctore M. Gottfried Vockerod. Jenæ, 1687. in 4.

Ægidii Menagii Poemata. Octava editio, prioribus longe auctior & emendatior; & quam solam ipse Menagius agnoscit. Amstel. apud Henr. V. Vetterstein 1687. in 12.

D. Matthiæ Zimmermanni Florilegium Philologico-Historicum &c. cum Diatriba de Eruditione eleganti comparanda. Dresdæ, 1687. in 4.

Joh. Schilteri Herennius Modestinus, seu Fragmenta de cautelis cum Commentario. Argentorati 1687. in 4.

D. Joh. Christoph Herolds Tractatus de Jure Ratificationis. Lipsiæ 1687. in 4.

Joh. Christophori Vagenseilii Exercitationes sex varii argumenti. Altdorfi Noricorum, 1687. in 4.

Opus Epistolicum exhibens Johannis Caselii Epistolas, in Fuchiana & Vagetiana Editionibus non comparantes; accurante Justo a Dransfeld. Præmissa est Herm. Conringii Epistola de Scriptis Caselianis &c. Francofurti, 1687. in 8.

Histoire du Pontificat de S. Leon le grand, par M. Maimbourg. a Paris in 4. a la Haye in 12. 1687.

Errata quædam.

In Actis A. 1686. p. 573. l. 7. pro *Thomam de Vio Cajetanum*, lege *Cajetanum Thieneum*. In Actis a. 1687. p. 236. l. 3. pro *Mechliniensibus*, lege *Lobaniensibus*. P. 256.

l. 12. pro *Paraphrasten* lege *Metaphrasten*. pag. 257. l. 22. lege *מסור דרר* P. 259. l. 28. pro *Antiochena*, lege *Alexandrina*. p. 269. l. 15. pro c. 3. lege c. 13.

